



空明子詩集卷之六

練川兄樸村先生選

華亭張 榮景桓著

日出

日出火輪紅昭昭上太空萬方同朗照一線必為通山  
海陶鎔內乾坤變化中如何推測者此理若能窮

訪古木堂禪師不值

偶來日慧寺啓戶已蕭然方丈風塵滿高僧木榻懸惟  
餘花送客只有鳥譚禪泉石空嗚咽盤桓古墓前

月下再過月牙池

水色渾如舊胸襟又一開菴荒從鳥集藻短認魚迴樹  
向池中出天從月裏來疎星遙隱見搔首憶蓬萊

八月朔泛舟八曲

松韻發天籟楓林醉曉霜雲濃迷遠岫霧濕暗橫塘  
闕遍龍鱗翠飄來桂子香孤舟驚宿鷺衰柳正蒼茫

重陽後泛舟峰泖間

漁艇泛前川鱸魚揚柳穿山楓丹嶂映湖水白雲連坐  
石思彈鳥臨淵羨擊鮮舟師催返棹風送木蘭船

戲用溪西雞齊啼五韻

冷桂傍幽溪空林日正西離羣幾隻雁何處一聲雞  
江艇來偏速村雲去不齊禪房無別事卧聽鷓鴣啼

挽家帶三先生

哲人今已沒我道竟如何跡隱交遊少窗閒著述多  
棄

官悲老大抱膝恨蹉跎仰止高山下悠然獨嘯歌

馮御史墓

長嘯疎林外悠然策短筇雲深不見日院靜若聞鐘  
石虎埋荒草蒼龍卧晚峰悲哉真御史空此弔芳蹤

偶步次家大人韻

偶步芳郊外黃鸝繞樹鳴柳風飄有韻花雨下無聲  
水急千帆遠雲開半日晴獨悲湖上寺搖落不勝情

春分

韶光無限好桃柳共爭芳氣淑春潮暖風恬野菜香  
林空天自濶山靜日方長望裏人家少登樓思渺茫

花朝

東風昨夜急桃李正芳菲古柏迷華表斜陽下釣磯方  
塘春水濶曲徑野花肥有酒應須醉閒吟莫浪歸

謁邑廟

我值困窮日君爲社稷神奠君三爵酒示我幾年貧髮  
白不復黑花殘豈更春人生如過隙拜罷倍酸辛

過積善寺

古刹荒煙裏禪房迥絕埃花遮殿宇靜竹雜雁聲哀落  
日江天暮浮雲海甸開與僧叅上乘相對此徘徊

過春申江

江波日浩蕩過客動秋思帆影隨蘋藻雲根見鷺鷥鏡  
中沉野馬空際隨游絲但覺臨流穩長吟釣可垂

重過春申江

江樹慘落日漁舟靜不譁荻蘆飛瑞雪鷗鷺踏晴沙波  
定雲留影風生浪欲花秋來無限意相對獨咨嗟

訪杲如師

鐘鼓荒菴靜高僧晝掩關梵音空澗谷晴色獻雲山煨  
芋心仍澹烹茶性獨閒清風拂人面塵念一時刪

晚眺

孤村低落日江樹散寒煙草與長天接雲和流水連遠  
鐘來竹院微火近漁船極目高丘外行吟意惘然

簡盛晉人

君才久未遇能不歎蹉跎詩酒長如是登臨近若何句

奇知意苦交泛識情多高卧申江上閒窗任嘯歌

寧國寺

寺界華上兩縣庭有羅漢松四株大約千年外物也

到此夕陽天塵心已冷然梵宮分兩縣松樹近千年石碣荒煙裏蓮臺蔓草邊徘徊不忍去清磬悟空禪

道士

道士共我坐示我黃庭經垂簾忘色相返照若日星谷神常不死赤子別有靈守此善運化悠然契紫冥

過韋馱菴

古渡寒煙散春風入短籬弟兄同笑傲桃柳任參差院靜蒲牢吼庭深燕子窺門前一帶水未許老僧知

過清河菴

率爾來幽徑巍然見梵宮樓高塵境遠室暗佛燈紅弱水無船渡迷津有路通我心應似石不與俗人同

夜泊周浦塘

塵勞得暫休遠浦歇孤舟竹隙窺微月沙灘咽細流乍看農務息猶覺鳥聲幽檢點杯中物臨風賞麥秋

和朱品方拈花菴卽事

蕭蕭竹徑斜春思正無涯水接申江遠橋連古道賒煙輕縈柳帶風急落桃花白雪難爲和偷閒且話茶

拈花菴詠虞美人花步吳日千韻

窗前蜂蝶亂小草亦堪憐露滴苔痕潤風迴花影妍芳魂成幻境舞態尚依然垓下徘徊意空餘此地傳

妾意那堪說花心最可憐願隨春共老不與世爭妍化  
草真奇絕鍾情豈偶然若非造物巧幽怨孰爲傳

初登海塘晚眺卽事

大海望不極登臨快此朝惟看清鏡潤未覺碧天遙島  
嶼何窮盡魚龍任擲跳三山如可到我意欲乘潮  
乘月聊閒步漁燈望裏賒龍宮春寂寞鼉窟夜誼謹帆  
影搖山脊晴光罨浪花前行殊未覺身幾伴魚蝦  
河漢三更冷海風四月秋遠山鰲背動荒寺鶴聲幽黑  
霧連蒼狗黃沙打白鷗東南聊極目天地若爲浮

碧湘施校書

好是慵修飾天然在箇中一言經咳吐滿室盡春風似

月微雲掩如花薄霧籠苧蘿堪把袂曾住越江東

吾廬

吾廬多別致草閣面平湖弄筆偏饒樂攤書正未迂無  
山不號拙有谷可名愚閉戶堪逃世兒童莫我呼  
最愛烹泉好清芬散席端風輕鳴小鳥雨細潤幽蘭一  
枕黃粱熟三更紅蠟殘夢中機械少反覺地天寬  
天地有定數人情多變遷親朋容易散忠孝豈能全不  
肯欺幽室常期守寸田所師非在遠彼美正當前  
石泉堪坐對花影上窗楞客似高飛鳥山如久立僧臥  
餘詩句好醉後酒懷增驛路空千里勞人歎夙興

舟中

舟行何所見春暮衆芳肥樹瘦蒼龍偃雲輕白鶴飛棹  
歌花裏出樵唱月中歸欲問前溪路漁翁在釣磯

石埭道中

雨過煙嵐淨新蟾分外明林深疑有虎山靜不聞鶯滾  
滾洪濤急巖巖萬壑成周旋惟一僕惆悵望孤城

當暑

攤書聊煮茗當暑怕登樓意懶聽鳴鶴心閒愛浴鷗賦  
詩平且淡讀古幻而幽世路真難涉蟲聲四壁愁

步雅臨四兄同盛悔亭避暑筐菴韻

曲徑藏精舍疎簾傍水開茶香浮綠雪酒熟泛金醅不  
絕涼飈至何如舊雨來近村風景異且喜遠氛埃

板橋連竹逕門外一花開禪榻留新月吟瓢酌舊醅地  
偏無客至院靜有僧來得謝炎蒸苦何妨沒脚埃  
清齋宜夏月蓬華爲君開莫慮瓶無粟反疑甕有醅錫  
飛不到處杯渡可能來忍草閒庭發相看絕點埃

湖上作

夙愛西湖好攜筇放浪遊松風愁欲暮潭影淨於秋亂  
柳蟬聲急空山鳥語幽不堪悲落照蕭寺獨登樓

春日

門外日色薄新晴綠滿山春殘詩漸短心懶夢常閒有  
恨終難別無愁未可刪翠峰應不遠策杖獨躋攀

唯亭

此夜唯亭路孤舟雙槳閒小橋偏隔市高樹却疑山未  
雨煙初重微風花正殷愁腸何處託三疊唱陽關

次楊下人潛籟軒韻

夢遊楊子宅精舍白雲隈喬木自疎密幽禽任往來山  
空萬籟寂軒敞一花開何日經過此相從醉幾迴  
登太湖莫釐頂望七十二峰是日風雨厲甚  
煙迷澤國遠傍午獨登臨山向靜中見詩從雲外尋帽  
欹綠雨急衣薄怯秋深憑弔鷓鴣子空愁白髮侵

姚欽六齋宴集得山字

吉水源流遠高軒傍小山真狂輸我輩避俗卽仙班酒  
潑葡萄綠花開躑躅殷莫愁歸路杳月色到柴關

登余山次二家兄韻

爲愛西峰好攜筇試一登泉聲碧玉磬山色翠紋綾廢  
井無朝汲空壇有戒僧行雲竚神女羅襪淺波凌

題春風玉樹閣

極目應千里茫茫二月春臨窗花解舞捲幔鳥窺入境  
寂堪忘俗懷開不覺貧莫談塵世事倚檻獨逡巡

春日

臨流堪遠眺春水正漫漫獨得此中趣應同如是觀窗  
虛當怪石花亞傍雕欄高卧長林下聽鷓鴣興未闌

咏陳朝雙檜

雙檜陳朝舊珠林伴曉鐘心堅如鐵石節勁似虬龍不



奉君王詔何愁雷斧攻高標足千古遠勝大夫松

春色

春色繞堦綠東風昨夜狂曉寒鶯語咽日永燕泥香柳  
葉拖清沼桃花點石牀蕭然人境外幽意入蒼茫

美人汲井

皓腕輕攜處無端窈窕生紅裙黯澹色金井轆轤聲乞  
得能消渴煎來善解醒仍從花底去雲雨未分明

當暑小飲

瀑泉懸卧榻消暑最相宜壁鼠癡堪玩盆魚樂可知臨  
流尋舊隱對景覓新詩愁殺無邊草青蛙鼓綠池  
我愛溪山好期君汗漫遊鶴觴容我覓龍拂待君求峰

疊堆如錦泉迴曲似鉤無人知此意夜月泛虛舟

不逢河朔士誰繼此風流小集遵三養微吟謝四愁蓮  
花沽舊釀葱涼薦新柔一仿東西晉清談得自由

舟中

稚子天機活篷窗笑語頻小橋餘翠柳矮屋傍青筠鷗  
鷺眠沙晚鴛鴦踏浪新畫撓風雨急遙指是歸津

江南好

共說江南好江南自不同花能知怨雨鳥亦解愁風紅  
粉迷金蝶青袍醉玉驄水流春雨膩煙鎖暮山空

綠牡丹

牡丹名品衆歐碧最芳華並葉疑無色聞香始見花綠

珠初出閣荀令合通家莫漫誇紅粉輕將翠羽遮

卽事

庭草年年長江潮日日增種花招粉蝶把酒畏蒼蠅未  
得如禪悅何因免盜憎新詩誰見寄惠我玉壺冰

庭中

雙桂影青青幽人幾醉醒種花成老大笑我尚寧馨接  
葉消炎暑交柯覆戶庭堪攜一片石獨坐寫茶經

松風

我愛松風好疇能帶得來曲廊遙引入小院暗招回針  
落苔堪繡花飄金作醅聊爲蝴蝶夢一枕絕纖埃

自傷

非是傷春淚胡因特地流看看花到眼漸漸雪盈頭詩  
酒徒增感登臨莫自由如何才四十衰颯不勝秋

獨坐桂樹下

嫩碧覆庭除窗間花影虛映茶香有別對酒色相於鬢  
髮三秋雪縹緗滿架書清芬堪擁卧奚事覓精廬

當暑

隆熾增煩鬱恢台見化功指冰難解熱蔭竹欲生風松  
覓扶餘石杯求鄭慙簫不將雲露嗽神體若爲融  
此日方徂暑炎歎久到門竹邊招韻士松下得芳尊可  
以消隆熱因之托大渾誰能裝雪檻一爲返冰魂

燈下次七弟韻

閒坐話更深翻書思不禁弗違作者意如見古人心燈  
暗緣蛾撲編殘有蠹侵因懷陶侃語還欲惜分陰

讀史有感

司馬爲郎後家徒四壁貧古今同一轍富貴幾兼人若  
箇憐非兇誰能起涸鱗五更風雨後獨坐淚沾襟

螢火

飄忽無常性生輝繼夕曛竹邊徒寂寞月下枉殷勤帶  
火將誰照臨風若自焚寄言憑眺者秋冷易離羣

山徑荷花

徑僻無人到山深見一花可能同玉井長此度韶華不  
作天斜態從無搖落嗟采蓮徒有賦羞對大方家

小赤壁

橫雲分小派赤壁有誰侔斧劈神工現崖懸鬼面愁四  
山皆拱向一水自環流我輩非蘇子猶堪試一遊

橫雲閒眺

散步橫雲麓攀躋力未勝望中松引鶴空際竹遮僧絕  
壁形如削危峰勢若崩誰能不對此一罄酒如澗

返棹訪王道人

紆迴成曲徑返棹一經過高樹妨青嶂疎籬接綠波數  
椽寧厭少十畝未云多何日重來訪相從唱踏歌

姚渭公以五律見慰奉和原韻一寫悲懷

悲傷何忍說凶問阿誰傳腸斷三秋月心驚十六年喪

明憐卜子哀慟泣顏淵痛殺文窗畔開箱理舊編  
幼年知好學頭角露英姿不赴修文召終攀月桂枝勵  
精還映雪刻苦欲施錐那得山陽遂臨風試一吹  
七齡方讀易已識有河圖八卦先能畫六爻隨意敷希  
天法行健學聖步芳趨欲見除非夢而今夢也無  
自悲年老大半世誤儒衣喪子今秋恨傷心何日歸背  
窗燈欲滅易簣露將晞此際堪愁絕人天兩地違  
弱小天姿異功名望早成誰知歸大化不屑鬪羣英地  
下應知痛人間獨繫情一誠真可格原弗間幽明

春郊同岑青岳散步

結伴看春潮行行過板橋竹遮千戶暗梅放一江遙麗

日催紅萼薰風展綠條誰能攜斗酒學轉聽鶯嬌

渡浦

舟發風狂甚羣言無渡河那知三尺浪怎敵一高歌密  
雨侵窗急浮雲傍樹多莫愁此際險何地不揚波

江上梅花

舟放小橋東寒梅倚晚風香飄不甚遠花發欲浮空對  
我春潭曲懷人夕照中愁多詩思減未敢夢師雄

過青浦

積雨經年沒輕舟傍晚行侵禾惟見水覆草但餘萍矮  
屋平吞浪洪波遠浸城不堪愁極目天際乍涼生

大水歎

汪洋竟無際可但沒園蔬海若開新宇江神失故居浸  
天愁巨浪入戶羨多魚想見陶唐世勞心九載餘  
夾岸禾生耳沿江草沒頭天空雲避日木落葉驚秋不  
道逢凶歲奚堪作浪遊歸橈愁極目莫上最高樓

賦送陸雲章表姪遊楚

之子將行役燈前罄此尊好看雲夢景收拾洞庭春儒  
術原難售吟懷不覺貧湘靈應鼓瑟爲爾滌征塵

聽琴

古調將淪沒何來此地聞一彈三唱後潭水靜無紋指  
下真難敵弦中自不羣微風動幽樹花雨落紛紛

和岑青岳一雨作

炎蒸方未已一雨便成秋黃葉有時落白雲無際流鷗  
閒真類鶴鵲巧不如鳩安得乘風便因之汗漫游

放榜後爲陸輝崖賦

十載名場內秋風屢被驚遂令天欲泣還恐日羞明細  
雨空來去浮雲自送迎江花徒夢筆腸斷石頭城

題家廣陵小照

梧桐高百尺小憇綠陰深過隙看塵世浮雲見素心餘  
香擷芳芷幽韻託瑤琴莫怪科頭坐纖埃自不侵

真如大寺

偶來荒寺裏高樹獨吟秋古佛如含笑貧僧盡帶愁草  
深人跡少瓦敗雀聲稠惟有門前水依然東向流

浮雲

浮雲生海嶠變幻度年華飄去終無跡飛回若有家偶  
然圍雨脚倏爾落風花最恨如輪日常時被汝遮

舟過崑山

哀角起嚴城江流正有聲荻飄兩岸雪榆落一天星微  
火蒼茫見孤舟呶啞行自憐年欲暮白髮向秋生

鍾賈山雜感

漸落碧梧葉旋開紅蓼花山童只見土樹老僅存了荒  
寺生寥寂殘僧倍歎嗟最憐陳氏墓雙檜落鉛華

早發吳門連過三鎮未午已至玉峰有作

早發吳閶渡浮雲天半生晴湖搖岸闊麗日照窗明水

迅過三鎮舟輕又一程馬鞍真秀絕不與玉山爭

玉峰

高山千古秀松柏列成行剩有撐天骨都無媚世腸蟬  
蛸看日暮第宅倏滄桑獨抱煙霞態閒閒草自芳

把釣

直釣隨意下立處脚頭牢春水盈三尺秋濤長半篙魚  
多終不羨首禿尚須搔一片閒閒石清風兩岸高

詩窮

共道吟詩好先須立品高叫囂格最下寒儉語徒勞只  
合親香茗殊堪醉濁醪會心應獨賞方不厭蓬蒿

和俞楠亭暑中舟行樸樹灣過王氏山莊韻

門第屬諸王平泉新闢莊抱枝蟬鬧曉映水竹生涼垂  
實看仙李敷榮見佛桑自憐飄泊甚兩鬢竟成霜

和詠桷亭韻

曾向上林過何妨借一枝高飛不自得卑集動人思講  
業來多士歎光住幾時研朱閒點易五色產靈芝

和俞桷亭看菊韻

師席高無敵官寒齋亦寒庭柯搖素影泮水動微瀾蘭  
向門邊憊琴從爨下殘何如一尊酒對菊且言歡

兆熊期歲偶筆

小子方周歲先須德性良學詩知應對習禮識趨跽仁  
義千秋貴文章百世芳相期真遠大不止續書香

附六言律詩

消暑

一葉隨風飄去笛聲吹出芳塘彈碁最宜清晝啜茗時  
聞好香楊柳根邊鷗鷺芙蓉花底鴛鴦退耕於焉樂志  
竹裏堪藏草堂

刺艇

刺艇翻書便讀悠然人世相忘竹深塵穢不到水闊蛟  
龍可藏午夢未完難續秋風初度微香但尋一丘一壑  
勿遠支公道場

叅道

返照垂簾獨坐爐飄一縷沉煙春秋能調四大鉛汞可

煉三田木榻琴書為伴紙窗風雨相連山中自有隱士  
九轉鞭著誰先

自得

一盞陶然便醉興酣落紙雲煙金衣綿蠻樹底玉剪下  
上堂前似錦桃花欲笑如絲楊柳堪憐良辰正當美景  
對此奚羨神僊

空明子詩集卷之七

練川兄樸村先生選

華亭張榮景桓著

春興

北鴻何事又爭飛好泛輕橈問釣磯幾疊雲山天外見  
數株桃杏水邊圍未逢俠客休沽酒漫為狂歌欲典衣  
無限繁華春寂寂片帆遙帶夕陽歸

相逢舊雨話河濱怪道如今又仲春豈為無魚思賣賦  
但能有酒未愁貧荒村修竹青方好隔岸垂楊綠乍勻  
世路崎嶇何所似千巖萬壑日嶙峋

調停寒燠是花晨一半春光又一旬覓宿黃鶯愁未穩  
安巢紫燕自相親五茸北去煙嵐秀三泖西來草色新



京洛風塵杳何許溪南甘作釣魚人  
殘梅零落拂柴門點綴垂楊繞後村北郭三春看錦繡  
南柯一夢醉乾坤千尋山岳橫天角萬里江河畫地痕  
誰許潢池窺塞外當關鐵騎正雲屯  
春來攜酒細林山帶得歌兒是小蠻白石雨侵因變綠  
蒼苔花謝却成斑洞天樓閣遊踪夥幽徑松杉屐齒艱  
此日風光殊不惡好憑晴色數煙鬟  
穿簾雙燕共翱翔一一銜花上畫梁流水有情環石屋  
落紅無數點匡牀栽松可免荒三徑放鶴寧期返故鄉  
安得柴桑老居士北窗高枕共徜徉

西湖次陳含美韻

六橋風雨載樓船山色湖光漾曉煙林樹龍蔥迷古刹  
波濤隱現暗長天岳王祠畔悲啼鴉蘇小墳邊泣暮蟬  
遙想當年白太傅裙腰一道句堪傳  
行來恰到斷橋西昭慶鐘聲聽不迷亭在湖心清鏡映  
塢參嶺半碧天低望江遠聽伍公浪隔岸空憐蘇子隄  
回首鳳凰山畔路幾經烽火動征輦  
十里長堤間六橋吳山樓閣望中遙嬋娟空想芳名在  
桃柳還悲劫火燒竺國經聲常到耳冷泉寒氣欲侵袍  
莫將短句翻新調座客誰能和紫簫  
西陵煙景看長松閱盡興亡恨幾重低鎖碧雲春寂寂  
高懸明鏡夜溶溶孤山索盡梅花句古墓空留處士蹤

空明子詩集卷之七  
放鶴亭臺常不改一憑僧叩五更鐘  
馬頭甲仗劍頭鋒武穆當年老戰攻不道英雄歸黑獄  
空餘鳥雀噪蒼松清波門外船如鴨鷺嶺山旁竹化龍  
把酒六賢祠畔望不勝憤懣向高峰

松關葛嶺總堪懷天道無情萬事乖杜宇聲聲催過客  
冬青歷歷莖金釵紅桃有意迎春日綠柳臨風照水涯  
目斷兩峰人不見塘空十錦漫安排

偶坐僧房聽竹枝芙蓉香發滿清溪晨鐘不斷飛鳥寂  
烟草無邊野艇迷地氣鬱蒸紅日暗天風飄蕩白雲低  
可憐一樣西湖水南渡君臣倍慘悽

幾遍興亡萃一湖藕絲菱蔓間菖蒲戍樓日落吹霜角

花港船歸狎釣徒面面雲霞堪入畫層層煙靄總難圖  
風流可但香山老點綴還應讓大蘇

白燕

瓊姿瑤態兩徘徊王謝簾櫳特地開下上堂前疑舞雪  
差池簾外認飄梅形隨粉蝶踰躑轉勢逐楊花次第來  
莫向月明溪上過渚鷗沙鷺定相猜

恭和家大人東臯公頌先祖從周公崇祀鄉

賢原韻

遐想音容約略同靄然和氣布春風有無必給推洪度  
物我相忘見至公閉戶好修多損抑觀天行律是欽崇  
先型不遠恩褒始共慶衣冠拜舞中

詠大將戲限同音五字  
指麾如意立奇功  
決勝何須事戰攻  
玉帳風生搖白羽  
天山月落挂彤弓  
烏蛇陣裏藏神武  
龍豹韜中出鬼工  
麟閣早登垂帶礪  
畫圖爭羨黑頭公

贈懷鏡淳

南面真如擁百城  
杜門惟有讀書聲  
碎金總讓雕龍古  
積玉還推繡虎清  
迴雪落花饒婉約  
剪紅刻翠擅輕盈  
誰言今代無枚馬  
屬耳卷阿聽鳳鳴

雨中蘭藥並放

堦翻蘭藥送殘春  
獨掩衡門漉葛巾  
樓起千層金不換  
根移九畹玉無倫  
卷荷酒盞資吟興  
睡鴨香爐伴醉茵

細數一年三百六  
幾回花下值良辰

丹鳳樓遠眺次家弘軒伯韻

申江浪湧排天地  
何處飛來丹鳳樓  
海闊緣知鰲背穩  
城偏恰稱梵宮幽  
綺窗東北開晴色  
文筆西南點素秋  
我欲乘風叫蒼狗  
茫茫極目一孤舟

月下望海

地勢東南成缺陷  
扞潮惟賴石塘環  
沙邊出沒高低鳥  
水面浮沉大小山  
龍窟夜珠蒙霧裏  
蛟宮明月湧波間  
迷離望眼何知倦  
瞥見漁燈幾路還

黃蛺蝶

撩葉迴風戀夕暉  
粟留聲畔覓芳菲  
飄飄欲隨松花片

栩栩時翻金縷衣  
新柳拂波偏得意  
嫩萱衰雨共忘機  
緗帷不覺雙雙度  
偷向深閨夢裏飛

贈性肩錢鍊師

洞庭山上最高峰  
結箇茅廬可托蹤  
不藉匡牀常卧月  
何須蔬食但餐松  
黃庭守住金丹固  
玉簡披來石匣封  
閒步灘頭聽漁笛  
荷花深處棹歌重

贈高純一道士

海虞高隱揖青山  
榭笠芒鞋性自閒  
玉女金童應有合  
青龍白虎正須刪  
人間莫道仙凡隔  
帝座能通呼吸間  
一鉢飄然遠塵俗  
會看紫府侍僊班

贈錢樂山道人

名家子弟具仙風  
羨爾丰姿迥不同  
日月常涵一炁內  
乾坤不外此身中  
時繙經卷諸緣寂  
獨坐山房萬象空  
莫道重樓懸絕甚  
三田呼吸自能通

微香閣

微香高閣好憑欄  
一片湖光六月寒  
嶺樹曉煙迷洞壑  
石泉夜雨潤琅玕  
琴書作伴身心靜  
雲水相依天地寬  
寄語深山猿鶴侶  
瑤階花草莫銜殘

端陽後二日舟發秀州塘

放船微雨著窗紗  
潮長橫塘沸綠蛙  
林外遠峰三四點  
水邊茅屋百千家  
隨波不斷菖蒲葉  
隔岸將開菡萏花  
莫謂身同天上坐  
好風能送布帆斜

舟次北新關戲題

萬家煙火一江風都會爭推浙省雄  
百貨盡從沽榷出四民爭聚市廛中  
談詩品酒天真在逐末居奇我道窮  
若使閒愁能稅去停橈檢點也匆匆

登湖心亭

湖光滿眼上層樓倚檻徐看霧靄收  
清鏡畫橈憑點綴白衣蒼狗任沉浮  
峰巒環抱天然秀城郭參差分外幽  
老我是鄉殊不厭巴人偏要逞歌謳

謁岳武穆祠

一代精忠千古祠魏我殿宇肅威儀  
淋漓碧血家何在擾攘黃塵恨可知  
毅魄不沉三尺墓奸人自合五分屍

可憐二帝歸沙漠腸斷南枝又一時

段家橋步至十錦塘

段家橋外正蒼茫步履難週十錦塘  
高樹亂翻湖上影長虹界破水中光  
夜寒應有蛟龍舞風急遙看鸛鶴翔  
一望瀾漫愁極目此心疑似對瀟湘

武林歸棹

放歌湖上興初酣桂楫遙通遠水藍  
泉到虎跑推第一寺當天竺列成三  
未經點綴山尤好如許風光夢亦耽  
此際解維增悵快皂林早泊看新蠶

煙雨樓

久晴忽作空濛態助我來登煙雨樓  
且喜了無山障礙

誰能不爲酒遲留荻蘆洲畔來青雀楊柳隄邊見白鷗  
漁笛數聲何處起憑欄真作畫圖遊

偶成

晴江一望曉霞開幾點煙鬟入戶來山水無人誰作主  
鶯花得酒自成媒綠圍院落新栽柳青逼階除舊護苔  
草閣獨登堪寄傲不知野馬與塵埃

次朱萼江見寄原韻

讀罷新篇仔細論橫行直欲逼文園由來古道多違世  
不慣新妝擬杜門丘壑何妨舒漫興鶯花若爲佐芳尊  
英雄半被詩魔老入座高談舌尚存

將有白門之行漫賦

奚囊檢點白門行古渡斜陽一艇橫把盞叫雲天欲老  
吟詩笑我醉難醒六朝煙草繁華歇八月江花寂寞生  
客舍恐驚霜入鬢十年回首石頭城

瓶荷限韻

幽棲地僻徑成三誰採芙蓉自浦南一几綠浮晴影散  
半牀紅潤遠香含堪邀明月侵冰簟直引清風下翠嵐  
坐對小窗多別致相期茗戰日沉酣

託根蓬海島名三移植還於小閣南斜卷青油和恨展  
半舒紅粉把愁含采蓮絕唱虛晴浦隔水相思對夕嵐  
恰似箇人春中酒巫山雲雨夢魂酣

同陳石城高文越小飲

兀坐蕭齋萬象空何來嵇阮共春風談何容易名狂客  
飲不求多號醉翁捷足直教空冀北高才早已占江東  
論詩說劍英雄老一半淒涼怨落紅

梅花次 家大人韻

玉龍耕出萬瓊田搖颺蟾光到水邊鷗立晴沙啄殘雪  
鶴歸華表弄輕煙春雲古渡殊堪憶暮雨荒村劇可憐  
一點冰心誰得似蒼松翠竹伴孤眠

案頭桃花經廿餘日不落詩以誌異

妬花風雨易摧殘獨有天桃更較難先發後期羞芍藥  
有香無色笑芝蘭漁歌野渡鶯聲急牧笛斜陽春興闌  
偶插案頭真耐久歲寒松柏合同看

訪王玠石

聞道桃源別有春泛舟還訪武陵人風晴柳陌真超俗  
日暖花溪似隔塵一卷破書消歲月半牀冷被接交親  
高山豈許尋常仰青史誰標老逸民

懷沈弘濟

閱遍天涯無是公紅螺那放凍春空但知守已當堅定  
豈信逢人要變通得句自怡香爇後對花共賞月明中  
愁霖忽作經旬別兩地相思同不同

貧女吟爲吳日千賦

一泓如鏡照殘妝深掩蓬茅愧短裳鑿壁借光愁永夜  
采桑遵路踏微行亦知玉食珠璣美幾見朱門蘭麝香

不願綺羅脂粉污守貞千古有遺芳

懷田孝廉

聞說西村路轉西西溪西去亂鶯啼山開晴日浮松翠  
魚樂深潭唼藻泥曲岸天桃含霧笑小橋垂柳向人低  
風流畢竟多愁思莫爲春醪花下迷

贈洮侯宗兄

別開門徑老柴桑處士星中此最狂襟度得來真灑落  
齒牙時復帶芬芳才空一世苞儀鳳酒到三行臂奮螳  
蜂蝶催花簾晝捲好攜春色細商量

花生日夢俞日如作

良朋入夢話飄蓬睡醒開簾萬象融愁比菜心隨日長

書題雁足隔年通家貧何地堪迎富耳暗從誰乞治龔  
春恨百般消不得應知惆悵暮山中

花朝憶董瞻祀

江梅已謝小窗東還見山茶一點紅寒雨蕭蕭遲淑景  
凍雲漠漠鎖芳叢誰家折柳吹橫玉何處垂簾鼓費桐  
盡日相思違兩地可能容易醉春風

同沈騶士會飲賦贈

歲星匿影久無光誰識東方一世狂不分侏儒終日飽  
且同傀儡暫時忙尊開琥珀傳鸚鵡曲度櫻桃引鳳凰  
謝絮沈錢吟不足好修封禪賦明堂

喜接趙柳介陳含美敘話



蜉蝣朝暮足營生抵死何緣苦好名笑執竹筒如佛佛  
醉穿木屐類猩猩電雷豈合長轟掣日月無端老送迎  
三徑幸逢來二仲半窗清話好尋盟

敝裘

敝裘一爲豁塵襟可惜年時酒漬侵幾度釣魚眠石上  
也曾趁蝶坐花陰歲寒著去心偏愛日暖披來力不禁  
尚有先賢遺跡在富春江畔得追尋

舊履

幾度尋芳趁晚晴穿林踏月話平生曾憐貧士決踵病  
解向佳賓倒屣迎徒倚未寧清夢苦躊躇不定旅魂驚  
履霜知是堅冰漸休傍天涯險處行

漫興同陳麟書賦

閉戶重修廣絕交獨登高閣俯青郊半鈎新月懸窗角  
一點殘陽下柳梢鳥語只宜花外聽鐘聲不覺晚來敲  
爭光魑魅休相傍山鬼如今也解嘲  
空庭蕙草逼階除烏有先生訪子虛茶裏尋香春過半  
松間覓影月來初隔谿柳眼青難寫別院梨花雪不如  
寄語故人休問訊長揚雖賦莫吹噓

梅花

占得陽春一著先不教凡卉溷芳妍淒涼茅舍空山外  
寂寞疎籬淺水邊瘦影夢迷雲白夜冷香魂斷曉寒天  
芳心已許林和靖肯向朱門聽管絃

卽席次青岩畫菜原韻得詩十首

蒙叟園居不矯廉菜根嚼處白於鹽綠浮煙際雲初斂  
青鎖池邊雨乍添紙上葉肥如可擷壁間影瘦莫須拈  
從他潦倒英雄輩在昔嘗來味自兼

笑我年來自奉廉采茶只合點吳鹽誰將老圃奇方洩  
漫向華筵錦障添早礪齒牙和影啖欲求滋味傍空拈  
山家風致尋常慣豈必朱門玉膾兼

兩袖清風石號廉飯蔬祇下水晶鹽咬殘鬆脆盤間剩  
譜入丹青紙上添幻影不堪酒後嚼空花曾向靜中拈  
諸君莫作等閒看妙手調來五味兼

採蕨西山千古廉啜來不著水中鹽摘殘生怕閒愁結

嚼處能教別恨添莫說園丁錢可得漫思山谷句曾拈  
笑人食肉真堪鄙誰是而今吏隱兼

待客從來若箇廉菜羹調出虎形鹽清明節後心初老  
穀雨花前葉倍添寫入畫圖簾半捲題成詩句筆先拈  
江鄉無限繁華子此味寧知饌可兼

獨對溪山敢號廉灌園耐可食無鹽青青河畔楊花落  
拂拂堤邊春草添小圃挑來惟我愛畫屏看去阿誰拈  
連年江左成枯槁此色難教百姓兼

漫笑東方割肉廉何如老菜糝青鹽味同君子交常淡  
韻似風人雅更添葉舞溪頭肥最好根埋沙際細難拈  
移燈近案休相訝醉看陰晴筆底兼

先朝郡守抑何廉買菜爲羹只著鹽渺矣風流誰可繼  
卓哉滋味不曾添扶蘇漫向瑤笈寫青翠難教秃筆拈  
看到心中生意動怪他形影未能兼

元脩嗜癖不傷廉清淨無煩雜米鹽到晚綠肥煙乍散  
入春青脆水平添揮毫落紙隨心運潑墨驚人信手拈  
醉後何妨閒遣興問渠風月可能兼

肖物從來風味廉何須刻畫學無鹽經霜不放芳心死  
未雨閒看別韻添詎可摘來成浪擲莫教寫去戲相拈  
詩情盡意稱雙絕妬殺王維二者兼

九弟留飲賦得紫牡丹次悔亭韻

託根紫府長仙枝憑餞殘春日正遲望氣直疑函谷染

聞香知是漢宮移閒庭且喜荆爲伴畫省應教薇並垂  
其奈無端風雨急相憐相惜醉金卮

立夏前四日舟過九峰道中

不堪重過碧山坳况更楊花著面拋身共膠舟逆水駕  
心同枯樹亂枝交荒村笛韻綠風急野寺鐘聲帶雨敲  
春意忽驚零落盡廿年魂斷憶蓬茅

渡金雞湖

推窗四望一高歌趁得晴光快渡湖遠寺微茫雲外見  
輕橈呶啞樹邊過雨餘好畫青山色風靜難描白練波  
何日江干垂釣去醉眠斜月枕漁簑

吳淞江晚泊有感

空明子詩集卷之七  
柔蔓依依笑女蘿附喬生意近如何煙花不覺經心老  
風雨無端彈指過愁並暮雲開未得恨如春草細偏多  
年來也漸精神憊一半詩魔半病魔

寒山弔趙凡夫

特地追尋處士蹤舊林一望綠陰濃只看怪石蹲蒼虎  
莫訝新雷變籀龍聽瀑亭前千尺雪法螺庵裏十圍松  
九原人去韶光在悲斷西山午夜鐘

華山亭子

萬松深處一危亭四面奇峰列翠屏天地不知何日老  
溪山應笑幾人醒欲澆塊壘樽惟綠得遠塵埃眼便青  
獨惜韶光同逝水鬢毛容易變星星

登蓮花峰

蓮花峰外五湖寬一帶斜陽春色殘極望喜無塵到眼  
探幽恨少竹搖竿儘教俯視三千界直訝同登十八盤  
我欲醉眠明月夜白雲來往漫相看

天平山謁范丞相祠

萬峰突起刺蒼穹呼吸能教帝座通礮路崎嶇人盡訝  
雲根斷續鬼爲工心驚鳥道泉飛白日眩龍門日照紅  
一代名臣九原外幾多士女弔春風

望靈巖

天作高山大國風僧房傳是館娃宮琴臺可在蒼茫裏  
履跡猶存想像中明月彩雲偏易散玉簫金管漫成空

屬鏤不把孤臣賜烏喙焉能霸業雄

月泊半塘  
載酒消磨短簿祠空山夜靜月明時預知花氣侵衣早  
且喜鈴音入夢遲杳杳星河光黯澹重重樓閣影參差  
來朝客況如何遣合有紅兒譜麗詞

坐千人石

何人高卧劍池邊不是詩仙便酒仙萬歲樓前花作隊  
四賢祠外錦成天雕欄曲曲環晴練畫障重重隔翠煙  
正欲送春春忽老半塘楊柳奈情牽

遇豔

三僊閣外見飛瓊邂逅無緣問小名蓮步只宜花並點

玉容堪與月同明溪邊照影魚應避樹底回眸鳥亦驚  
珮解漢皋爭易得魂銷一似月初成

望馬鞍山弔故相徐立齋先生

鵲聲入夏悵無端天際微茫見馬鞍流水影空飛霧遠  
落花風急袂衣寒丘山處處新添翠日月年年老擲丸  
若使至尊憐舊輔爲言墓木已平安

訪練川沈天庸於九蓮精舍忽動尋梅之興

綠暗城西花正饒竹林小憇聽江潮卿雲詞賦同欣賞  
園綺衣冠獨寂寥我道未堪求飽煖此生端合老漁樵  
會須直抵揚雄宅棹入梅源載酒瓢

訪陳含美吟室

百城高擁未愁貧愛爾幽棲遠市塵隨分風光成漫興  
不關榮辱老閒人竹中抱影誰能識月下敲詩獨有神  
豈少名園等金谷爭如一室樂天真  
訪蔣漢襄  
託迹偏宜曲徑中老於詩酒萬緣空時乎已矣浮名薄  
命也如何我道窮踏月留題尋野叟坐花覓醉結隣翁  
敝廬咫尺君來者莫使行蹤笑蟄蟲

郊行

水雲無際一孤亭柳暗溪橋醉未醒敵國慣看排蟻陣  
村翁曾許覓牛經布帆幾點浪空碧鐵笛一聲山自青  
芳草夕陽何處渡沙邊海鶴獨梳翎

閒感

願天爲地地爲天反覆重看態變遷頃刻滄桑憐古墓  
等閒花木笑平泉閉關心嬾真成癖拜石風高未認顛  
莫羨侯門似蓬島從來富貴幾人傳

月牙池

一灣澄碧映晴空高樹森森在望中石馬松風御史墓  
金獅花雨梵王宮弓弦未上知初地鉤影長留想化工  
若得結茅池畔住垂竿竊比釣漁翁

繡球花

小山新綠夜來浮誰把冰丸挂上頭綴就梅英成太極  
團將抹麗作星球白雲深處如含笑皓月臨時合解愁

贏得玉壺春酒熟對花還擬狎盟鷗

蜀葵

繇花銷歇候南薰閒看芳葵對夕曛種出三巴開錦幄  
豔分五色鬪龍文吳宮教陣紛相逐巫女行雲雅不羣  
何似隣家爭照眼石榴偏解妬紅裙

次世修舊咏原韻

願將詩酒罄交歡豈肯饑從漂母餐未免有情悲鶴髮  
誰能堪此笑儒冠鴛鴦水畔憐文彩鸚鵡籠中鍛羽翰  
尚友義皇真不遠北窗無語對檀欒

退耕端合老丘塍傑閣還登最上層逐兔暮雲悲勁弩  
網蛟秋水怯寒罾酒徒舊結真狂士詩社新聯耐久朋

已分生涯混樵牧爲誰愁絕瘦如僧

小窗疎影易橫斜寂寂村居傍水涯行澗僅如猿覓果  
候門仍有鹿銜花擔瓢策杖思求藥敲火烹泉且鬪茶  
爲語隣翁莫相探恐妨翹首赤城霞

佳樹遙遙結翠陰探幽直欲卧雲林煙霞一幅丹青畫  
鶯燕千聲長短吟空谷花開香寂寂埃亭馬驟影駸駸  
誰能伴我乘黃鶴共聽吹簫明月岑

漫成

老燕穿花入夏驕看花湖上獨逍遙蛙初出水青堪寫  
雲乍離山淡欲描蔓草荒煙悲落照斷碑殘碣認前朝  
芒鞋伴我多生趣莫向垂楊憶楚腰

晦夜訪計子山讀書處

一椽耐可白雲封  
月黑燒燈訪戴顛  
吳下難重逢義犬  
洛中堪再覓癡龍  
催人好句譙樓鼓  
動客新愁野寺鐘  
餘子何須煩齒頰  
願追屈宋繼芳蹤

憶練川符匡世

披裘石室老瞿硎  
寂寂松聲枕上聽  
非爲醫貧翻藥譜  
寧因病酒乞茶經  
陶真擬著閒情賦  
守鈍常期古硯銘  
獨卧三江多歲月  
任人遙指少微星

寄上洋盛晉人

寂寞江城蕙帳空  
打窗梅熟雨濛濛  
繪圖未得追公量  
歌曲真堪並小叢  
憐此臥餘緣病酒  
愛渠詩好爲愁窮

連年知己成飄泊  
同在天涯落照中

贈沈遠照俱用吳興故事

蒼頭仕宋足平蠻  
何似休文老病閒  
賦竹不須勞顧問  
織簾端合住雲山  
願邀仙馭題貧樂  
羞唱迴波悅聖顏  
直遯周家知世澤  
可能腰鼓得追攀

贈趙二火

寂寞花村老謫仙  
穿雲踏月度流年  
闢開物外神奇想  
鑿破從來混沌天  
竹裏揮絃調舞鶴  
柳陰清嘯和鳴蟬  
幔亭風景如相憶  
南望遙遙隔翠煙

贈蔣旦宅

曾從三徑接風流  
氣概真同百尺樓  
大海方能容怪物



浮生還擬困書囚不將身世勞魂夢剩有文章寄唱酬  
已著寶貧堪嘯傲虞卿誰與話窮愁

贈吳念廬

小窗新雨碧無塵郊島何緣此地親人到窮時骨更傲  
詩從老處句尤新青衫豈合耽丘壑黃卷真堪泣鬼神  
指日龍頭應有屬不教雙鬢漫成銀

贈程鍊師

爲尋瑤島逢仙吏曾共紅雲侍玉皇同謫風塵多不染  
各耽山水兩相忘夢勞東去江淮急齒冷西飛烏兔忙  
擬跨麻姑大鵬背海天還與話滄桑

雨中宴集同家硯銘伯咏隔歲芙蓉

芙蓉隔歲榦如松愛此繇花照眼中直訝拒霜能拒雪  
但憐無月更無風臨窗已足誇紅藥覓醉還疑遜碧筒  
遙憶當年石學士秋來魂夢或相通

九日宴集限登高二字韻同七弟作

小樓逕曲喜同登放眼真宜最上層身似春前沾雨絮  
客皆秋後得霜鷹但能花底燈爲伴何用山間月作朋  
竹葉儘堪乘興倒夜深庭露冷於冰  
漫笑兒童百事高菊邊有客泛松醪愁租未獲完三韻  
得酒何妨頌二豪座繞微風堪脫帽肴無兼味愧持螯  
醉中還訂明年會休恨秋霜入鬢毛

丁丑歲暮雜感

勸君冬日踏層冰消盡炎炎氣鬱蒸廢塚妖狐宵入夢  
隔墻奇魅夜吹燈催人歲序如流水對此風光那割藤  
破臘一枝梅信早曲欄撫遍又還凭  
兩間萬物總成空一歲光陰又漸終三十餘年埋牖北  
四千里路說遼東笳吹夜月愁羶帳雪壓風沙勁角弓  
此况算來我分少不如高卧碧窗中  
愁對寒燈黯不開驚看電閃夜聞雷農憂澤國堪悲矣  
龍躍滄洲反快哉潦倒未能溫舊夢淒涼相與試新醅  
民生國計俱當念心事尋常莫浪猜

一掬寒潭澈底清此心還與共爭明攤書夜展千層玉  
看雪朝飛萬點英猶有篇章度殘臘更無思慮到新正  
怪他鬚鬢皆如舊何事蕭蕭白數莖

不須彈鋏歎無魚閉戶看看逼歲除筋力漸衰嗟已矣  
年華虛度欲何如客貪曲徑風來少酒敵嚴寒雪下初  
雖乏薄田供數口教兒勉讀惜三餘

家貧風味少從容况更連年歲屢凶酒僅逢塲供宴會  
衣纔蔽體減裁縫金壺澹泊心偏喜玉粒艱難手自春  
得便買舟堪放棹一丘耕稼且相從

雨打黃昏直到門斷腸誰與細溫存酌量今古詩千卷  
顛倒乾坤酒一尊只願前村雞抱子但祈新歲竹生孫  
花時好作留賓計世路悠悠曷足論

齋前新植花木數種

破寒春意長青苔草木欣欣待早雷葉密儘堪留鳥宿  
花開還要引蜂來碁殘一局柯應爛日上三竿夢未迴  
得酒得朋拚盡醉但辭熱客少塵埃

手把牀頭一卷書與來今日坐花初藥舍小砌先堪玩  
草長閒階也會除守我清貧仍若此較他富貴待何如  
客來莫訝多踈懶宿酒騰騰在睡餘

多謝陽和到草芽衝寒梅意上花梢舊愁不待清樽解  
新曲還須黃鳥教反覆人情如海浪崎嶇世路類山坳  
紛紛裘馬休相顧爲我重修廣絕交

春陽乍轉未能驕早是東皇到柳條徐上綠梅幽磧發  
更吹紅藥小山飄窗前已許聯新好日後相期訂久要

茗椀詩筒愁不了漫勞隔浦數聲簫  
些些拳石類煙嵐映帶清冷一勺潭不費舟車勞遠望  
便於朝夕得常探花時酒釀賓堪賞月下茶香我最貪  
所謂伊人來夢寐願言開徑好停驂

城西小築漸成林山可常登水可臨藥綻海棠三月錦  
花生叢桂九秋金愁中忽地朱顏改鏡裏相看白髮侵  
二十年前曾閉戶自來嬾惰到如今

閒庭花影聿參差疾瘡烟霞勢不支撥破綠萍魚暗覺  
摘殘紅杏鳥偷窺蝦鬚半捲嫌風冷龍腦常焚笑我癡  
獨向寒潭聊自鏡鬢邊生怪一莖絲

門外狂風來去頻寒枝凍臘待陽春三間翼翼堪長嘯

十畝閒閒未是貧較彼鳳池寧作我寬於蝸舍足留賓  
不知多少朱顏客埋沒長安陌上塵

笑他臨老入花叢誰料而今也作翁幸遇客才皆繡虎  
不嫌我技是雕蟲桂枝低亞宜招月簾幌稀疎好待風  
竹葉一尊堪傾倒但愁天氣雨濛濛

不夢三刀想益州任從我作醉鄉侯千杯未了還千首  
一壺偏宜更一丘燕語鶯啼花月曉吳歌越調管絃秋  
比他朱鬢羞多少稍覺身閒得自由

嘉平望夜用香山除夕韻

獨嗟雙鬢漸參差潦倒襟懷愧未堪數點殘星高斗北  
一聲清磬落城南交親每向花前憶吟咏偏於燈下詣

四十平頭君記取明年三月是初三

示堯子用香山西湖韻

窗明几靜少塵煙愛聽彈琴抱七絃總角初成纔六歲  
蒙心漸去望他年怪來語似頻飛燕那更身如不繫船  
貴賤豈因愚智定兩途端的落誰邊

抱燕兒用香山味道韻

學語未成纔學笑笑渠孩抱惹情深兩般巧拙他年事  
一點完全赤子心智慧每從姑息悞狂騃因被俗緣侵  
何時雅好吟殘簡陪伴衰翁理素琴

哀吟

那有傳來却老方漸於衰朽轉情傷除他舊恨悲年暮

贏得新愁覺夜長  
怒髮三千消綠蟻  
狂風廿四開紅妝  
不知對酒看花客  
幾度哀吟欲斷腸

贈友

清白傳家書一卷  
舊愁新恨莫相將  
休於了夢纔爭鹿  
那可臨歧始泣羊  
心似蛟龍行雨憊  
身如蛺蝶探花忙  
天公早已安排定  
難道尋常老是鄉

憶金星槎

三千里外燕山客  
五十年餘東海人  
潦倒殘生驚歲晚  
鏗鏘佳什動秋旻  
琴尊閣暖初更漏  
桃李花深二月春  
愁絕故鄉民力盡  
繭絲毛鷲總難陳

空明子詩集卷之八

練川兄樸村先生選

華亭張

榮景極著

花前卽席限韻

新柳參差影不齊  
半村風雨近城西  
素心只擬交如水  
小飲何妨醉似泥  
繞座幽蘭香晚晚  
隔簾芳草綠萋萋  
峭寒天氣鶯喉澀  
笑折花枝傍檻低

過三天竺

山逕逶迤草半荒  
僧房是處野花芳  
蒼崖翠壁嶙峋出  
梵宇琳宮窈窕藏  
或抑或揚皆節奏  
如絲如竹也鏗鏘  
此行最愛泉聲好  
不信與人底事忙  
遊東塢朱買臣墓

天氣輕陰鎖綠煙徘徊孤塚弔先賢當年政績知何在  
幾代滄桑尚未遷幸有鐘聲伴寥寂自來鳥語結因緣  
最憐見棄妻孥日卓氏當壚固足傳

春郊偶步有感

無端風雨入殘春水漲池塘草色新天地獨驕騎馬吏  
山川終老釣魚人筆鋒雖秃還堪試舌本猶存未是貧  
聊向清溪聽漁笛幾回寒食弔青燐

見白鴨

一羣白鴨立江頭次第呼名卒未休野鶴並棲形覺小  
閒鷗相狎性偏投梨花落盡斜陽岸柳絮飄殘芳草洲  
雖遜雪衣諳梵語山陰換字或堪儔

登元妙觀彌羅閣

獨登傑閣俯全吳倚檻長吟興不孤天外雲山真縹緲  
望中城郭實模糊鶻聲半爲愁紅雨春色還堪倒玉壺  
身在丹青圖畫裏幾多詩景付奚奴

支硎山

支遁山前最可憐可憐尤在暮春天翠消新綠疎林外  
香減殘紅落日邊松徑如簧鶯弄舌蓮臺似霧獸歎煙  
空亭鶴放何年返華表歸來已惘然

望震澤

怒打空山撼巨鰲郡人爭說子胥濤接天難見雲霞落  
矯首惟看日月高槩影劈開疑灑雪浪花生處不容舳

可憐霸主俱灰燼腸斷英雄心計勞

趙屯橋

宋主南來此地屯虹梁賸遶水邊痕流鶯出谷如求友  
小犬迎人直到門且喜車書稱一統不愁兵甲見孤村  
三吳幸際承平日回首當年也斷魂

普惠橋漫興

便算無情也有愁清江萬點照晴丘半林花落知春晚  
四月風高似暮秋愛此兔葵心未老羨他燕麥子初收  
題詩切莫傷貧病獨坐乾坤一小舟

燕

年年社日擬相招剪水穿花不憚遙並宿呢喃聽婉轉

雙飛下上見丰標泥香端憶春初好影瘦偏宜簾外飄  
王謝舊堂還記否丹青妙手鮮能描

午日

澹雲天氣午風柔花底稱觴綠蟻浮猶不如人徒事鬼  
未能免俗也同鷗沉湘志苦千秋在封薛功高一代休  
誰謂綵絲堪繫臂笑他生死類蜉蝣

姚渭公見訪擬卽往答索閱詩稿

清風喜得到衡茅爲訂忘形爾汝交深礪最愁逢渴虎  
怒潮生怕觸饑蛟綠堦蘭草萌新笋傍石榴花孕絳苞  
莫謂離羣真嬾惰豈能無意向書巢

喜與翁馭臣坐話

爾我無慚總角交，交深寧止漆投膠。人情不異爭碁局，  
世事真同探卵巢。駒影難馳郵路遠，芥舟堪濟草堂坳。  
茫茫冷笑西飛日，爲讀滎陽易一爻。

賦送慕庭大兄北上

朝聞天語促仙舟，夕捲行裝敢逗留。流水送人忙似  
燕，青山笑我拙於鳩。望塵百職皆前膝，指日三公到上  
頭。宦海風波無際險，不知何以慰離愁。

賦送芳園二兄

雨足黃梅兩岸平，江干無限別離情。休將傲骨資談柄，  
莫作新詩頌履聲。遠樹霧消山更好，嫩晴煙瘦鳥初鳴。  
關河水驛三千里，珍重雲間第一程。

結廬用香山郡樓對雪韻

結廬卧病託城西，不敢清狂類滑稽。月照畫堂穿竹徑，  
鳥啼別院隔花溪。品泉茶竈臨窗窄，傍屋松枝壓帽低。  
最怕無端風雨急，嫩紅狼藉污春泥。

夜坐

無裘可典愧窮途，寂寂寒宵夜景徂。無意踏憐花影碎，  
有情坐愛月輪孤。清鐘聲遠醒蕉夢，紅蠟光搖映鴨鑪。  
却任旁人閒指點，春秋天地一狂徒。

放言

那得牀頭滿種松，引風入戶響淙淙。收他秣米三千斛，  
澆我閒愁一萬重。詩興豈勞紅雨助，洞門不要白雲封。



紛紛花月尋常過，卧看春雷起籜龍。  
空林誰叩一聲鐘，飛入天門徹九重。  
玉皇宮闕盡盤龍，聽他翠管鸞凰叶。  
醉我瓊漿琥珀濃，劍珮冠裳塵世外。  
偏於此處得相從。諸度衆星皆拱極，  
百川無水不朝宗。此生竊忝稱詩虎，  
縱死何慚號酒龍。華表會能來白鶴，  
化城猶得住芙蓉。憑他駒影誇流俗，  
夢斷襄王十二峰。

可憐一腹本庸庸，卿等偏能百輩容。  
啄肉笑他同猾鷄，甘貧愧我並寒蛩。  
已違柱國生前願，合拜閻羅地下封。  
倘許春秋重筆削，墨花銛似劍頭鋒。  
我似人間嬾惰農，秋成無分望三冬。  
風雖作塊難充口。

雪若融來好滌胸，野火燒殘狡兔出。  
小池竭盡凍魚從，醇醪乞得招仙侶。  
一曲高歌月下逢。

人世紛紛莫浪誇，閉門枯坐轉咨嗟。  
一尊玉液杯常滿，半枕黃粱日又斜。  
月中黑山中獨足，鬼春深溪畔兩頭蛇。  
悠悠生死皆前定，驀地相逢當眼花。

退守清真遲暮年，犁雲耨雨算耕田。  
鳥驚飛砲初然火，獸駭強弓乍歇弦。  
曾向山巔尋碧水，慣從江底覓青天。  
游行自在無拘礙，擬作蓬萊一散仙。

蕭蕭歲暮成何事，凍筆呵冰強作詩。  
東海漸看真苦惱，西方猶見大慈悲。  
難拋別恨如疣贅，無用微躬類指枝。  
病染煙霞花酒債，一生勞頓未能治。

何事黃鶯苦好鳴日長花放轉春晴遷喬愧我孤身拙  
出谷輸他雙羽輕偷向隙中窺百歲暗於石上會三生  
看看鬚鬢皆成雪好與沙鷗訂舊盟  
石火餘光一晌明妖狐變態自輕盈煙寒嫩柳垂何處  
春暖新鶯啼幾聲屍塚隊中愁對坐髑髏堆裏笑相迎  
高懸幸有如輪日得託乾坤過此生

愁坐

慙愧生涯正渺茫性情如桂復如薑五千言裏醒殘夢  
三百篇中老是鄉病比春前初中酒花當臘盡乍回陽  
那堪窗畔閒相較一樣慙慙愁斷腸

小除夕

誰料今朝逼小除盤空瓶罄待何如尋梅那要眠孤艇  
賞雪無心跨瘦驢五夜漏深殘燭短三更月上矮窗虛  
謀生不足妻兒笑檢韻吟哦愧有餘  
口直怕聞人過失心閒愛對客清狂折花插鬢羞華髮  
得酒消愁少別腸覓韻尋香煙縹緲品茶剪燭話荒唐  
誰家鼓吹喧天半月色平臨映曉霜

隔林矮屋裊寒煙裘敝無端補綴聯好聽鶯聲將百轉  
漸看柳態欲三眠臘殘昨日殊堪念春到今宵更可憐  
安得交親皆聚首小山酩酊惜花天

寄盛晉人書

殷勤爲報燕山客讀古還期仔細參元白放歌殊可愛

錢劉逸響最宜探下車莫學馮家婦閉戶堪師魯國男  
倘有新詩懷故舊願憑尺鯉寄江南

希聖

天理流行要問心五經四子足追尋明窗宛侍先師側  
暗室常聞上帝臨剖析是非如斷獄陶和情性在彈琴  
須知希聖無奇策危坐終朝學正襟

除夕

抱病昏昏暮景人惠存常自愧交親耽吟不覺青春老  
顧影惟憐白髮新花盡一年殊足悵酒逢此夕莫辭頻  
平生多少關心處休把閒愁攪幻身

元旦

節屆新正乍暖天向陽草木動晴煙無端意緒成千結  
那得琵琶撥四絃漸漸可憐紅雨夜看看欲到白頭年  
賞花醉月尋常事就裏機關秘不傳

許九尊舅痘殤詩以哭之

十年前亦哭嬌雛此日傳聞淚與俱因甚誤拋懷裏璧  
何緣驚隨掌中珠憐渠稚齒情堪痛愧我狂夫與轉孤  
若念西河卜子夏他生重到舊家無

人日

舊傳人日知何意此際重看態變遷反覆無常如昨歲  
陰晴不定在今年酒存歲盞微寒夜餽剩春盤小雨天  
一曲放歌差自喜牀頭還有買花錢

西湖春濤

三泖年年此日情  
桃花春漲浪花生  
迴濤乍立凝冰雪  
觸圻羣飛撒水晶  
細柳新蒲渾欲折  
閒鷗宿鷺亦相驚  
莫言湖濶風波險  
世路風波更不平

咏雪美女

一樣娉婷似玉奴  
六花裝點勝凝酥  
淒涼粉貌惟愁日  
冷淡冰心不憶夫  
大士結趺纔入定  
文君新寡未當壚  
偏生怕是春風妬  
吹送芳魂泛五湖

山茶

移向齋前一小叢鶯啼蝶撲不禁風  
葉繇深似鴨頭綠  
花發鮮於鶴頂紅  
名擅寶珠原自別人慚  
冰玉未能同

無端桃李閒開謝  
爭及山茶伴醉翁

唐春江見招因足疾不赴賦謝

嫩紅淺綠吐新條  
花逕逡巡遣寂寥  
黑髮漸於頭上減  
朱顏不覺鏡中銷  
偏愁病足多妨步  
應愧知音遠見招  
雅意在心如已醉  
莫勞青鳥下層霄

自詠

一生口債詩千首  
三月春光綠滿丘  
自分漁樵甘沒世  
那堪風雨助閒愁  
但憑頭髮斑無愧  
若作吾腰折便羞  
西郭南村漫遊戲  
沙邊相狎有輕鷗  
自知句好徒爲爾  
無那心頑不奈何  
歷亂雲山看去少  
循環歲月得來多  
寧甘把淚和花落  
豈分將身被墨磨

頭白眼昏成老大百年光景半蹉跎

幽居

乍晴天氣暮雲濃爾許幽居疊遠峰映水還宜數竿竹  
隔牆不厭一枝松琅玕正喜堪棲鳳鱗甲惟愁欲化龍  
斗大乾坤君看取只愁塊壘未能容

教兒

色相從今一筆刪可憐雙鬢已成斑最愁雨濕還傷足  
每憶花開早破顏苦到幾時纔得樂忙他不了且偷閒  
教兒好學人家黠莫似而翁老尚頑

上元日喜晴

積雨連宵喜乍晴柳條未破綠新萌小山日暖苔初潤

勺水冰開鏡自清曬翅漫同林下鶴暴鱗因想海中鯨  
憑他歌舞娛心目不及茅簷此際情

招陳吟室小飲

恕我癡頑白髮新形骸脫略見天真三春總計纔正月  
百歲平分未半人不向此時酬大塊更於何日覓閒身  
浮生苦好雲中鶴肯到花前一擺塵

閒吟

半生淪落有誰親只許心交四五人趁熱鶯花翻覺巧  
入門風月不嫌貧大都身世原無著總計公私莫認真  
貴賤到頭終自幻北邙衰草亂青燐

春日閒吟用香山韻

柳條得雨三分重塵事關心半點無軒冕奴顏人盡爾  
布衣自足那如吾蜂衙早聚誰能散蟻陣相持若箇輸  
倘任彼蒼提傀儡此中隨地有榮枯

課兒有感

教兒莫計貴和貧貴者常驕貧者真况我煙霞成僻性  
借渠風月樂閒身未甘責備由來許豈敢求榮望後人  
或似他家紆紫客但愁老去轉酸辛  
吾兒未必甚愚蒙善體親心念老翁一領破衣隨分著  
三餐粗糲不愁窮欲修天爵須由我要辨神奸莫露聰  
異日倘為騎馬吏風情矯矯勿雷同

郊望

吟詩獨上最高樓不覺蕭蕭兩鬢秋晚嶂新稠濃似畫  
春潮乍長滑於油蒲生鴨綠浮孤嶼柳挂鶯黃颺古丘  
陰雨連綿誰補漏楚騷讀罷倍離憂

呈許端臣姻家兼寄陳含美隱君

細蘿何幸託喬松贏得干霄直上同總藉巨材綿世澤  
不教小草負春風花時且喜無人管月下常期有夢通  
相得相須願相傍芳隣况有嶧陽桐

戲為疊字體

年年日日見卿卿款款輕輕細細聲水水山山迎燕燕  
枝枝葉葉打鶯鶯風風雨雨看看好草草花花處處生  
夜夜一燈燈寂寂斷魂魂夢夢清清

閨怨

限溪西雞齊啼韻并一二三四五六七八九十百千萬兩丈尺雙半

晴峰七八抱清溪尺鯉誰傳三海西九載愁看四六句  
五更怕聽百千雞征鴻兩兩聲偏亂歸燕雙雙影不齊  
半縷情絲牽萬丈倚欄十二一悲啼

四山咫尺照晴溪萬丈峰迴七堦西兩淚空拋半夜月  
十年相憶五更雞眉鋪八字千林秀蓮感雙尖二瓣齊  
一日三秋腸九轉愁聽百六亂鶯啼

五峰百丈繞雙溪掩映珠樓十二西尺素九秋傳旅雁  
寸心兩處聽晨雞關情七八韶光去別恨三千華嶽齊  
燈下百回看四六相思一半夜烏啼

一心不二伴花溪三竺曾遊方丈西四海五湖兩地月

千山萬嶺半村雞六銖百和飄香遠七夕雙星乞巧齊

細數歸期應八九十年灑淚背燈啼

限前十  
字順用

十百離愁遍九溪八千鐵騎渡遼西七襄盈丈晨看雁  
六出飄花夜舞雞萬戶五侯功半退四山兩眼望中齊

三春消息憑雙燕二月鶻聲一淚啼

限前十  
字倒用

雨中承許端臣訂賞海棠有感而作

聞君花發滿閒庭雷雨無端枕上聽老我形骸何日住  
醉人天氣幾時醒惜春常罄三杯綠顧影惟慙雙眼青  
擬泛扁舟甘痛飲為憐鶯語苦丁寧

咏海棠花

一樹胭脂耀眼紅煙籠月照小窗東杏桃縱好神難似

蘭藥相將態未工濃淡恰宜真國色笑顰入妙託春風  
那堪花信無情雨斷送殘英曉夢中

赴許端臣宴後一日復承惠海棠一枝漫賦

良朋攜手赴華筵對酒看花劇可憐今日倦來緣酒醉  
昨宵悔不共花眠一枝贈我傾城色二月愁人陰雨天  
如許風光寧易得半消春思在春前

自歎

自歎生成孤介身花枝且喜緊爲隣交親憎我多緣直  
鶯燕憐人未覺貧每爲熱心遭按劍願將冷眼事書紳  
牀頭有酒甘長醉好向劉伶託後塵

初秋夜坐

井梧飄後月如霜坐看秋容雅淡妝高樹蟬嘶風轉急  
虛廊螢度夜初涼三杯合是澆愁藥一枕須知却老方  
從此閉門君莫問不堪頭白更情傷

秋來益覺鬢如霜豈敢還修時世妝已見芙蓉開爛熳  
那堪蟋蟀語淒涼看書借月真長策服玉餐霞有秘方  
漫誦嚶鳴求友什鵲鴿原上獨悲傷

誰能爲我搵元霜得見真仙倚靚妝織女橋邊銀漢冷  
嫦娥宮裏桂枝涼香沾兩袖衣無縫酒醉千杯眼欲方  
萬一罡風吹隋下俯臨城郭轉堪傷

近水還宜種拒霜含煙帶露晚來妝金尊行酒酬花媚  
玉笛飛聲怨夜涼彩筆未能干北斗塵根那得戀西方



望中多少長隄柳搖曳秋風轉自傷

自傷

形容莫怪漸清癯倚檻長吟伴月孤酒醜斷來疎筆墨  
甌塵生處累妻孥撲簾苦愛流螢度壓石誰憐老榦枯  
覽鏡自知寒乞相就中已較一籌輸

先母見背未及半載小女又復病殤詩以哭之

無端忽失掌中珠况值親喪苦塊初凶事那堪重疊至  
殘生能保百年餘痛如帶箭傷弓鳥悶類吞鉤上餌魚  
終日昏昏惟欲睡空勞花影照牀書

擬泛杭州上越州多緣汝病故遲留芳魂自爾歸三島  
靈魄誰云滯一丘分手弟昆何處去關心父母此生休

最憐垂絕頻頻囑莫為殤兒特地愁

伴我消閒半局棋空庭常玩好花枝獨憐弟弱難支病  
每念親衰暗皺眉倚檻愛看一片月臨風喜誦數篇詩  
吁嗟此際堪愁絕訴與啼猿總不知

生女如兒性雅馴憐渠智慧未愁貧看書頗解參難字  
繡線常添愛好春轉眼汝經十八載傷心我是四旬人  
行將葬爾高原上一畝梅花白似銀

喜接諸同人小飲述懷

葛巾漉酒燕佳賓坐對秋深獨愴神多病形骸惟我老  
無頭學問有誰親常師映水虚心竹聊避征途撲面塵  
睡足日高閒不過糞除一室也經綸

大雅相過未寂寥平生本願絕塵囂暢談世事真碁局  
冷看人情似柳條楚地風煙容易散吳天波浪豈難消  
不如勉進杯中物且喜偷閒度聖朝

上元夜登樓望青岩開筵張樂賞美人走索燈

白袷凌寒強自支登樓遙望動相思玻璃綠凍浮松葉  
窈窕紅牽勝柳枝金管銀箏歌玉樹鶯喉燕舌鬪蛾眉  
梅花伴老幽人夢長慟春風怨別離

步訪岑待詔復領小酌兼聽竹鷄歸而漫賦

東風拂拂草萋萋步入桃源路欲迷紫笛曲長如有怨  
銀瓶酒熟正堪攜翩翩調逸誇金馬滑滑聲乾叫竹鷄  
抱渴臨邛君莫笑斷腸何處好留題

戲爲青岩家優童鳳池作

有美踟躕似子都曲廊引我醉醞醑鴛鴦比翼歸丹嶼  
鸚鵡能言倒玉壺不夜城中然豹髓生春帳底展龍鬚  
鳳池原屬仙郎占可許漁蓑一釣無

江上作次二家兄韻

錦塘潛綠怨春遲柳挂金絲鬪黛眉凹地隨風雲液瀉  
浮天薄暮玉鉤垂踏青乘簡吟殘照醉白傳柑卧斷碑  
緱氏山頭好乘鶴擬將大棗問安期

九峰積雪

平原一望九峰齊積素層層鳥道迷紺宇模糊松影亂  
玉山巉崒月輪低吟詩豈必求驢背招隱無從訪剡溪

好待日晴花爛熳醉尋煙柳聽黃鸝

梅

嫩晴春色上簾衣凍玉凝霞雪一圍庾嶺寒香浸初月  
羅浮清夢醉斜暉竹邊別韻欺傾國柳外孤標伴少微  
留得廣平賦心在五湖煙水釣魚磯

哭許端臣姻家

綠窗幾度醉花叢深院閒階遊處同豈意仲冬題鵬鳥  
遂於殘臘葬西風吹簫來會羞如勃埋玉空悲竟類充  
今日酒罈誰念舊青蠅能弔夕陽紅

隣家劣犬

不戀從前舊主仁慣憎蘭珮見精神修毫釐睨羞同類

白雀青檀恥比隣畜火漸如韋氏怪寄書爭及陸家馴  
閒人莫笑雞刀小請聽張雲議論新

再哭端臣

絲蘿原屬舊朱陳每捧瑤華迥出塵玉樹竟爲泉下客  
桂花空憶月中人藥欄紅落經春雨竹徑青搖見鬼燐  
我轉自悲成老大向平婚嫁獨傷神

玉蝶梅

靚妝何必五銖衣一覺揚州人事非驛使自能傳婉孌  
巢居豈復怨癡肥曾從越女奩中見疑向莊生夢裏飛  
紫燕黃蜂猶未鬧獨留風韻憶江妃

見金犢

奚事墻東老僧牛慣驅金犢此間遊如花空落陽關外  
化樹遙傳豐水頭扣角長歌徒太苦彎弓命中亦何求  
方春只望逢丞相嬾散桃林得自由

閒步

初晴猶覺薄寒侵獨向江頭俯碧潯一點額梅輕似雪  
數枝眉柳嫩於金商量春色憑花鳥斟酌人情問古今  
極目蕭條惆悵立廣陵絕響歎亡琴

紅梅

孤標瘦影劇清芬點染臙脂較出羣王母赤盤擎絳雪  
玉皇金闕捧紅雲亭如紫府新歌豔骨換春風落照殷  
却笑羅浮裝束淡衆仙同著石榴裙

綠萼梅

支分庾嶺獨踰躑萼綠前生本是仙醉我疑眠青瑣闥  
引人恍對碧羅天鴨頭漢水同清韻螺黛隋宮點翠鈿  
好倩鄂君張羽蓋移將疎影傍藍田

用穎川事贈含美

陶寫羅浮筆墨香詩追無已調鏗鏘梓州峻望干牛斗  
劍浦長吟叶鳳凰德聚五星占太史計奇六出動高皇  
如今休更誇驚坐且學希夸入睡鄉

對客書懷

白髮星星日暮情紅螺誰與話平生愧無供客銀絲鱠  
剩有齋僧玉糝羹一飯未酬羞短褐五言難擬築長城

綠雲駘蕩湘波影鵲尾焚香鳥不驚

散步

行波金線長纖埃蠟屐行吟起紫苔  
一院梅花懸價售  
六街蘭草扇香來青袍那怕風霜妬  
白髮常憂鷗鷺猜  
盡日春陰愁暮雨相思空羨楚陽臺

獨坐

鴨焚龍腦睡凝香盡日無人春晝長  
葉背暗依看蝶嬾  
花鬚亂數笑蜂忙黃嬌不散愁千縷  
綠綺難消淚兩行  
多謝白雲常作伴擁爐披褐對縹緗

竹鷄

滑滑聲中晴雨分何緣錦翼鎖朱門  
金籠可憶韓憑魄

血淚難題望帝魂飼米眼穿烏借樹  
浴沙心羨鶴乘軒  
平生雅愛黃陵廟時夢西江綠竹翻

杏花

凝酥漱玉罨紅芳暈雪融霞妬豔  
妝色染太真巾上汗  
幕聞荀令坐來香濕煙帶霧爭春  
館寒雨初晴碎錦坊  
豈羨蓬萊開六出醉歌斜日背金牀

擬村居

杏花垂柳繞幽居縱復窮愁懶著書  
木可爲奴魚可婢  
流堪作枕筍堪輿不須窈窕求金谷  
豈必鏗鏘覓錦車  
仲蔚蓬蒿甘坐老一生耕讀伴樵漁  
勾龍司社日初長蕙轉光風到錦塘  
撲蝶尋花誰復會

治聾乞酒客先嘗鶯梭獨織黃金縷燕前雙拋白玉堂  
春事模糊看不見落紅流入一溪香

九峰積雪

代應試作

遠峰重疊潔無垠一片瓊瑤凍粉塵斜日帶煙水作骨  
淡雲籠月玉爲神白頭似對香山老青眼如逢庾嶺春  
慙愧師門才立後敢誇環珮賦清新

公子家

曲曲闌干北斗斜珠簾翠箔護簷牙屏開鸚鵡圍春色  
鉤挂珊瑚鬪晚霞爛若雲停宵作晝飲如波卷醉爲家  
洞房長夜歌金縷哭殺翻風怨落花

無題

新潮乍長遠連天嫩柳垂條散綠煙燕上畫梁尋故壘  
鶯穿嘉樹說流年捲簾愛看山光好傍檻潛窺花影妍  
怪殺小蠻窗下立笑梳雲鬢索青田

桃根桃葉笑相迎楊柳櫻桃逐隊行觸處關情登小閣  
有時私語坐深更五銖細細和身稱雙鳳纖纖蹴步輕  
最是玉釵怜惜甚爲他芳草賭輸贏

繡成雙鳥是鸚鵡照徹光明鏡一匳拖去翠裙金側側  
拈來斑管玉纖纖曾經刻畫花增媚略涉詼諧語帶尖  
幾度夜深星斗下開窗雲霧濕珠簾

弄粉調朱四五年知寒識暖倍增憐開匳光動金釵色  
捲幔香凝寶鼎煙醉後索茶常侍側燈前磨墨每爭先

莫因春暮嗟搖落牽引愁腸到酒邊

小立閒庭日未中太湖石畔見輕鴻  
弓鞋踏遍庭蕪綠錦袖攀殘仙杏紅  
似此可能乘彩鳳問渠曾否夢維熊  
那堪一陣傷春淚灑遍窗前花信風

只諳歡笑不諳愁十五盈盈便上頭  
一朵天桃真豔麗千條弱柳自風流  
尋春雅愛湖山僻覓徑常探松竹幽  
細數百般俱較可但看醉態更溫柔

瞥見輕盈一小星乍來行酒靠圍屏  
含愁不止三千丈問歲方當十四齡  
堪笑甘心作老嫗最憐私地祝寧馨  
潛踪寂寞深更後獨拜瑤階月滿庭

銀蒜雙垂錦帳前繡屏斜插鏡臺邊  
捲簾欲隨湘妃淚打卦空拋鴛眼  
錢花貌暗愁紅雨濕金鈿不整綠雲偏  
胸中無限酸心事寶鴨焚香竟日眠

春色次七弟韻

東風吹夢入煙花春色朦朧薄霧遮  
嫁杏有情思李氏種桃無主憶劉家  
游魚噴沫晴波曲飛鳥流聲落照斜  
獨戴幅巾攜竹杖緣溪閒覓雨前茶

愁落梅

飄零無那又黃昏斜月蒼茫點葦門  
簷外一枝才索笑江頭三疊漫銷魂  
吟詩玉女愁風信送酒紅衣隨淚痕  
腸斷欲留留不得金尊檀板細溫存

草蘭

和風偏喜獵蘭叢靜裏相看品不同雞舌含來花婉婉  
麝臍薰透月朦朧國香有種先春報甌露垂珠落日融  
空谷無人芳自在丹心誰復怨啼紅

過古墓

茫茫大塊最無端每笑彭殤一例看石馬徒聞嘶夜月  
水梭誰與薦春盤佳城鬱鬱青苔鎖永宅蕭蕭碧草寒  
獨上高原愁極目柳絲遙挂夕陽殘

僧家以魚為水梭花  
因墓傍有僧舍故云

坐愁

非關歌哭獨傷神寂寂柴門風雨頻幾度玉簫楊柳暮  
一鞭金勒杏花春青田憶昔成陳迹絳樹如今屬幻塵  
斷續漁樵驚曉夢五湖煙月付閒人

送朱奇輝入京時 駕南幸

收拾魚竿謝釣磯驪駒唱罷欲誰依東風一別魂消柳  
南浦相思月滿衣芳草岸頭逢鳳舸杏花村裏見龍旂  
長揚有賦乘時獻莫憶蓴鱸早晚歸

訪陳含美不遇

春光乍媚夕陽斜為訪西山望落霞三逕綠封環竹葉  
雙扉青鎖對梅花惟餘石髮庭中滿那有松髯象外賒  
不是山陰迴棹速白雲來去本無家

見落梅

狂風送雨到柴門不是飄梅是斷魂幾陣冷香浮碧落  
一團瘦玉泣黃昏輸他綠柳參參影伴我蒼苔點點痕



忙掃殘花入竹葉醉吟佳麗問乾坤

雨後晨起見梅花無恙因以誌喜

風雨終宵自可由朝來捲幔雪仍浮當壚卓女千行淚  
傅粉何郎一段愁金翡翠邊看雅淡玉蟾蜍裏醉溫柔  
誰知傲骨冰心客別有香魂伴勝遊

憶橫雲梅花

一簾瘦影伴清灣激露噴珠夕照間對酒何妨金作谷  
望雲仍要玉爲山王家冶麗誇桃葉白氏風流競小蠻  
倘與此花相掩映會須銷盡鏡中顏

空明子詩集卷之九

練川兄樸村先生選

華亭張榮景桓著

貴公子

寶馬雕鞍金僕姑從禽那復畏泥塗蛾眉捧硯皆花貌  
珠履盈門少釣徒銀海幾泓浮琥珀玉鉤三尺挂珊瑚  
可能絕意酬嵇阮辜負黃公舊酒壚

上林人柳欲三眠此夕侯家列綺筵畫檻寒飄花逐月  
珠簾香逗藥欄煙插天第宅橫金鑲匝地笙歌落翠鈿  
老盡春風渾不覺燭奴高捧度華年

隋堤

旄頭十萬擁仙槎殿脚三千繫臂紗玉館煙霞歸麴部

金堤花草屬官家，星馳鷁首湖山麗。  
電閃龍牙日月華。誰道錦帆容易遍，空教垂柳怨啼鴉。

偶題

當壚換酒解金貂，對月憑欄度玉簫。  
南部煙花容易歇。北邙沙草最難消，萍浮曉葉迴風嫩。  
柳入春枝向雨嬌。獨惜韶光倍惆悵，帶圍寬盡沈郎腰。

梅殘

連宵淫雨落梅花，憶殺孤山處士家。  
春夢那能拋玉骨。東風若爲掃鉛華，澆愁寂寞三杯酒。  
送老淒涼一點鴉。紙帳輕寒人不寐，只宜酩酊度生涯。

半生

幾度投竿寂寞濱，半生惡况怕良辰。  
雨餘芳草千山暮。風落殘梅一院春，舊恨重來梁上燕。  
新愁難掃案頭塵。綠楊影裏聞長笛，爛醉斜陽魚鳥親。

卽景

綠淺紅鮮小閣東，壓簾銀蒜照瞳矓。  
鏤金低酌梨花釀。碧玉高吹楊柳風，蝶嫩顛狂憐藥圃。  
蜂忙懊惱怨蘭叢。不知消得春多少，腸斷王孫芳草中。

玉笛銀箏度曲遙，東風吹暖過斜橋。  
綠塵細潑仙人掌。金線輕翻楚女腰，却醉葡萄酬月夜。  
漫吟芍藥候花朝。春寒夢淺衣篝冷，一炷溫磨著意燒。

曲屏矮几小窗中，翠羽青筠伴醉翁。  
苔鎖錦甌衣泛綠。

花侵香閣臉凝紅送梅夢斷三更雨候柳春迎六幕風  
愁緒滌洄吟思苦寒燈一盞倩誰同

樹影參差隔遠峰日高殘夢苦重重松醪似海酬三雅  
春草如煙醉五茸花底蘭芽青萼鎖階前石筍紫苔封  
同人若問平生業酒興詩懷列附庸

一枕寒從琥珀來綠沉屏外報輕雷恨同錦帶飄千縷  
腸轉雕輪過九迴紫玉硯頭堆斷簡烏皮几上落殘梅  
含愁幾下鮫人淚遣悶惟憑麴秀才

滿庭春色最關心習習東風入戶深玉匣劍寒燈影暗  
金爐香煖月痕侵殘花似夢閒來掃幽夢如花覺後尋  
不上高樓愁極目翠銷紅褪淚沾襟

簾颺晴波照晏溫拂簷綠竹鎖衡門心驚草草完殘夢  
花放輕輕續斷魂若箇淺斟獨樂苑何人低唱莫愁村  
玉鳩杖我尋芳徑煙樹蒼茫沒燒痕

碧磯苔長卧漁蓑一樹春風昨夜過犢鼻正堪酬綠蟻  
鴉頭恰稱踏青螺花迴盡檻餘香散雲鎖芳塘落日多  
頓遜杯前拚盡醉醉眠不擬負煙蘿

暗香漠漠觸衣襟無限春光在碧岑看去渾疑金繡護  
坐來微覺麝蘭侵漫容蝶粉栖芳草時有鶯黃啁翠林  
更愛一灣階下水流紅浸月發清音坐看  
荷衣怕惹馬蹄塵寂寂丘園幾度春病起愛尋岩洞月  
愁來難理釣竿綸九華入袖收零玉一葦衝波棹碎銀

不惜緼袍償酒債便疑孫濟是前身  
銀壺傳漏蠟燈紅未必相思兩地同  
坐雨最愁南浦月  
擁爐惟怨北窗風  
尋芳挑菜逢青帝  
結綵飛觴問社翁  
遙憶禁煙應有約  
梨花莫放甕頭空

同青岩鏡渟集吟室賞綠萼梅

何處天仙散綠塵一杯竹葉洞中春  
蒼苔黯澹如愁雨  
青鳥來回似勸人  
豈少暗香侵北戶  
尚餘老榦壓東隣  
百城坐擁真奇貴  
况有名花更不貧

道人口厭寒香味處士庭栽索笑花  
翠羽颺煙浮小院  
綠雲籠影護輕霞  
豪吟自昔同吹鳳  
狂飲誰能復畫蛇

歌哭一回天欲暮  
醉殘明月上窗紗

半疑晴雪半疑煙  
深院清幽寂似禪  
飛鏡解穿小有洞  
散花真下大羅天  
師雄好夢堪同醉  
和靖無妻欲共眠  
簾展潘牀愁不寐  
一尊相對翠屏前

乍晴

乍晴嫩日長三篙  
簾外微風度碧桃  
壓夢未醒靈粟重  
啼鶯纔轉豔聲高  
柳條拂綠迎金勒  
草色回青鬪錦袍  
恰似貴妃初出沐  
鳳釵慵整困香醪

申浦阻風

頽風駭翻鵲聲乾  
獨坐危檣細柳寒  
怒浪倒翻千丈雪  
驚飈高矗萬層巒  
煙迷梵院垂楊鎖  
雲暗花溪古木攢

今日一尊酬白髮相思空對夕陽殘

浦南獨步

煙昏日暗竹森森獨步長堤背浦吟夾岸有橋通小市  
密雲無路接遙岑新鶯學囀方饒舌老鴿揚鈴送好音  
泥滑草深春思短斷腸垂柳在江濶

雨窗寄鏡淳

幾回香燼鴨爐煙默坐芸窗手一編紅杏望風飄院落  
綠楊和濕帶鞦韆經時對酒憐醒客竟日看雲怨醉天  
縱復浪仙吟思健也應愁絕竹廊前

書懷

驅車策馬非吾事對酒吟詩稱此心蘭佩豈勞香麝拂  
荷衣忍放軟紅侵東園蛺蝶尋花早南浦鴛鴦戲浪深  
聽罷鳥言行不得閉門高卧到如今

見桃花

五尺天桃傍水濱向陽先報一枝春如憐紅粉門前客  
似憶元都觀裏人對此臨風嬌靨輔還思垂柳小腰身  
路傍未許多攀折待點蒼苔作錦茵

槐柳周遮列翠屏豔妝獨立更亭亭紅燈夜燦人初醉  
絳幔春寒夢未醒映水似憐臨寶鏡迴風忍見落沙汀  
助嬌銷恨當年事時憶楊妃兩鬢青

不長泛艇

抱琴攜酒上漁船夾岸隨風柳帶牽桂楫影搖千頃碧

竹爐香散一溪煙釣竿拂水魚鉤曲茶竈驚雷蟹眼圓  
不是志和甘泛宅更何人與共周旋

新燕

穿簾度幕兩相招似向東風訴寂寥泥帶藻香春入夢  
花流水暖晚回潮故巢冷落毛衣嫩新壘經營意匠遙  
門外紛紛桃李豔月明雙影正飄颻

贈趙柳介

一度浮生六十年閉門枯坐轉陶然高風竟是先生柳  
清操還同君子蓮涓滴未能非戒酒和平安用更張絃  
尋常不著閒情賦肯結無端白社緣

書齋招二火柳介鏡溥小飲

書齋得共話綢繆喜溢蒼蒼兩鬢秋梅豆青來春色老  
桃花紅褪暮煙浮聯吟欲奪錢劉席並坐如登李郭舟  
風雨不常兼卧病一尊消得許多愁  
蕭蕭暮雨竹生秋便是無情也動愁况更好花成隋淚  
不堪芳草竟埋頭殷勤且進杯中味汗漫真同物外遊  
幾度夢魂拚化蝶逍遙豈獨有莊周

贈問俗亭上人

一椽不礙海隅天寂寂僧房便是禪花逕未勞開士掃  
竹牀堪贈野人眠題詩也喜吟紅藥斷酒無妨社白蓮  
誰道虎谿三笑後風流止許讓前賢

綠牡丹

名葩自昔推姚魏何處飄來萼綠華五斛漫將螺黛寫  
一枝偏稱翠鈿遮傾城不借胭脂色巧笑疑籠碧玉紗  
千古風流誰得似箇人髣髴李倫家

卽景同七弟作

東風吹遍蕙花香好倩晴絲繫斷腸褪粉殘花供蝶板  
化萍飛絮助魚糧輕拋玉剪簾重捲亂織金梭柳一行  
時序關心易惆悵數莖白髮對斜陽

新移牡丹乍試一花漫賦

曉煙才散日初溫早喜天葩試小園不逐繇紅迷錦障  
獨舒一萼向芳尊鈎留月影疑無夢界破春光若有痕  
翻勝朱門欄百寶笙歌幾度醉朝昏

却占層臺地位尊半枝值得也銷魂未聞學士歌三闋  
已識真妃捻一痕風暖有情開白晝月明無語對黃昏  
紛紛蜂蝶休相覷盡日溫存獨掩門  
國色何緣獨殿春香魂無那更愁人長顰似憶三郎鼓  
淺笑誰堪六驛塵曉露乍沾環珮濕晚霞初散月華新  
莫將一段行雲意漫學陳王賦洛神  
一年獨占好風光寒暖初調日正長南國初來人窈窕  
東皇不管夜淒涼莫教紫燕黃鶯笑合有紅燈翠幕張  
最是藥階吟未就開簾早已透微香

歲暮有感

臘殘無奈被愁牽怪殺階前景物鮮縱有好花難入眼

那能美酒度流年催科政急憂無策浮海槎輕樂似仙  
願與二三同伴約莫將生意問蒼天

柰他雨困更風顛無計忘憂益自憐薪桂米珠休動問  
蛇神牛鬼漫周旋倚窗最苦違羲馭負郭惟愁有硯田  
白髮蒙頭君莫笑何緣高枕得安眠

迷離檻外物華妍不似寒天似暖天人到於今真更苦  
花逢此際倍增憐甕頭竹葉全無信釜底松枝半是煙  
病肺何年得少可堪愁病更愁煎

一年生計在春前風雨連綿倍黯然我待醉來渾似死  
誰能醒去竟如仙消愁只有兒堪教入暮無勞鬼見憐  
香冷金鑪寒不寐月華望斷眼空穿

十一日喜晴

初晴回想久陰天鎮日相逢劇可憐幾處樓臺淹雨雪  
數聲感歎託詩篇淺寒裘敝猶疑熱小草花開未覺妍  
金玉杳然堪悵絕桂堂樽酒足流連

立春前一日

韶光取次到寒梅獨凭闌干愁緒來風信暗吹花魄動  
日輪晴引鳥聲回繡簾不捲鴛鴦夢綺席空拋鸚鵡杯  
節物催人如過隙百年身事付塵埃

春愁

紅杏飄殘眼一驚春愁如夢未分明雨餘乍長王孫草  
日暖初調公子鶯笑折花枝搔短鬢醉吟詩句坐深更



登樓望斷青山碧獨倚朱欄寄遠情

索居

索居真覺半生勞引鏡驚看見二毛蕭瑟自憐寒入骨  
浮沉空歎跡如舫匣塵不掃愁金線燭淚頻流哭寶刀  
幸有屋邊梅作伴開簾還擬醉葡萄

春宵花下口占

笑倚窗前雲母屏閒披白袷謝青藤更無是處詩千首  
或可容來酒半升象管新聲歌絳樹羽衣妙舞拂紅燈  
良宵不負千金值恍在瑤臺第幾層

長歌當哭

諸君爲我停杯盞聽我長歌當哭聲惜恥那能叨上第  
無錢誰許得虛名閒吟竊恐妨前輩閉口還防礙後生  
囑爾知心三四友恕吾狂態莫相驚

花生日

解愁無計欲沾裳積雨初晴更斷腸燕睇恰當逢社日  
蝶忙應爲覓春陽柳眉斂黛含新怨杏臉融霞媚宿妝  
除却醉眠消不得好聽鶯語奏笙簧

夏日偶書

貧憎兒子求鮮食老畏交親索報書戴勝降桑簾寂寂  
韓憑入夢晝濛濛雖無冰碗供長夏幸有蘭香襲短裙  
手把一編閒自誦此生應是勝樵漁

獨坐賦貧士吟

支頤獨坐暗傷神一卷殘編怕誤人白盡髭鬚惟欠死  
銷完精魄未逢春鶯花歷亂無生趣風月尋常得苦辛  
剩有甌塵何暇掃幾回珠桂覓交親

對雨

晏眠竹榻雨淒淒嫩綠新抽花逕迷鵲尾不驚蝶作夢  
蝦鬚時污燕銜泥栽成楊柳三圍大覓得菖蒲九節齊  
強飲一尊天欲暮任歌白日與黃雞

期客至

閒來無策足娛賓且喜殷紅照眼頻旗展一枝香到盞  
蟻逢初熟竹生春桃花舊釀爭先設錦帶新烹敢後陳  
若箇岸巾籠鵲翅只譚風月不談人

卧餘

半枕清風晌午眠奚童閒掃落花前驚雷莢到難睜眼  
荷插人來好息肩望裏浮雲爭出岫竹邊流水恰通船  
相逢莫惜如泥醉門外洪波直接天

夜坐苦雨

小齋苦被濕雲蒸霪雨終宵得未曾百計難驅來白鳥  
一簾長挂隔青蠅杯中耐可逢賢聖句裏奚堪任愛憎  
身是餐霞塵外客蘇門還許謁孫登

荷花

誰擁凌波仙子來嫣然不語笑顏開香飄夜月流明鏡  
色帶朝霞醉綠醅翠蓋儘容鷗鷺戲紅妝可許蝶蜂猜

多應分得濂溪愛太液何勞逞賦才

贈樸村大兄

曾向揚雄問字來何人不道是仙才  
龍埋獄底光冲斗  
琴被焚餘響似雷萬卷載盈三十乘  
一囊貯滿幾多回  
金臺自古堪憑弔莫鎖衡門賦玉杯

題舍美令祖先生吟室

爲仰高山訪太丘平居絃誦足千秋  
當年舊德真書種  
繼起文孫屬隱流我愛此中真有味  
君於身外更何求  
從茲鼓吹無虛日壓倒吳興八詠樓

憶得舍美柳介同飲蘭若有作

楝花風急絮飛銀曾共金蘭訪正因味  
向山家嘗處淡

詩從方外得來真誰聯此後尋芳伴  
更憶從前勸酒人  
回首笑談如隔夢刺桐欄畔一沾巾

無題

黃銷粉褪盡欄前瑤草琪葩滿砌邊  
倦眼忽驚紅雨墜  
芳情無奈綠雲牽壁間鸚鵡窺朱戶  
屏上鴛鴦踏紫煙  
可惜菱花祇照面夜深不照並頭蓮

相逢恰值落花前春事如雲澹似仙  
風颺曲鈎簾弄影  
香焚沉水鴨歎煙梧桐直上難爲伴  
蘭蕙聯芳好並肩  
窈窕綠窗珍重意素心知在阿誰邊

默默低頭怨綺羅一腔愁思在秋波  
粉香暗向燈前度  
膏澤偏留枕上多羞對旁人呼小字  
慣從爛醉問歡哥

輕盈合侍西池母但恐溫柔入病魔  
貞靜偏教別致多輕肌底事不勝羅篆煙一任飄蘭麝  
鶯語憑他自嘯歌豈有睂心能鎖恨幾曾眼角解流波  
夜深伴讀銀燈下笑煖松醪意若何  
路近城南日乍陰脩脩綠竹自清音數椽茅屋隣蕭寺  
半畝桃花枕碧潯有分終須求玉杵無緣空歎隔仙岑  
相逢一笑三生幸况飲瓊漿得醉心  
薄薄鉛華傅雪肌櫻桃一點襯臙脂玉簪斜插香雲膩  
金釧雙籠彩袖垂烏鵲斷橋違好夢翠蛾深鎖悵佳期  
黛螺收拾空箱內不遇張郎不畫睂

卽事

庭幽綠嫩茁蘭芽蟹眼新煎仙掌茶聽籟獨思君子竹  
題詩那到女兒花扇開雉尾隣冰室拂展龍髯冷日華  
箕踞不干門外事天台何必飯胡麻

漫興

安排龍尾泛松花寫罷茶經日正斜休愛粉香妨蝶夢  
莫貪黃蠟悞蜂衙絕無旨酒堪浮蟻小有閒房僅類蝸  
含笑露蘭真我伴開襟相對讀南華

和朱秉士客樓寓目作

綿邈煙雲望曷窮梵宮幽處鐸吟風浮圖金碧斜陽外  
高樹蒼黃宿霧中僅隔一垣如有礙稍低三尺卽能通  
不因王粲登樓日誰復題詩向遠空

雨窗同趙柳介夜話

何妨月黑上高樓急雨潺潺夜色幽涼吹欲驅炎氣散  
電光長繞白雲流靜綠於我雖無分清况同君卒未休  
不信半生彈指過可憐徒有稻粱謀

當暑

簾展湘波鉤挂銀曷勝毒熱欲焚身清能吸露思齊女  
聚欲成雷怕黍民誰到老來不作我臣之壯也未如人  
只今潦倒無生活踏遍殘紅卧醉茵

對梅花

昔年移植此齋中一樣蕭疎逸致同豈料暮愁添白髮  
遂今老幹傲春風病餘忍放玻璃空月下還期翠羽通  
香夢不來消息斷凍雲寒雪鎖芳叢

海棠移植齋中已經三載今始試花喜而賦此  
三年不見試新紅此日相看託化工那禁柔情含曉露  
最憐弱質蕩春風品超仙杏無心妬伴結天桃有夢通  
但得嫣然逢一笑東君肯放酒杯空

春遊有感

閒遊無日不傷神淚灑東風草似茵衰去漸看筋力倦  
愁來羞對杏桃新酒因病肺春尤減詩爲關情老怕親  
惆悵故交零落盡晨星幾箇白頭人

春分日

中和佳節會金錢挑菜城南樂事偏青帝一揮風似扇

社翁幾度雨如綿鶯穿嫩柳聲猶澁燕睇空梁壘未全  
莫把韶光等閒擲鬢毛白盡已經年

渡浦

片帆飛渡早潮平三老長年自不驚塵世恰如飄一葉  
海天何異託浮萍誰家桃李風前綻半枕松篁夢裏情  
回首那堪頻眺望澹煙寒雨過清明

同友人郊行

昨宵雞唱報輕雷社雨紛紛長綠苔挑菜忽傳佳客到  
握蘭喜見故人來不知命也真癡絕且往觀乎亦快哉  
同是天涯淪落輩草茅何必愧非材

尋春

幾度尋春過野塘布帆斜挂日蒼黃風流跌宕看楊柳  
濃豔溫柔見海棠一抹山輕青簇簇半篙潮長白茫茫  
此情已覺魂銷盡况聽鶯聲更斷腸

海棠花

巫山洛浦遠相從手捲珠簾喜乍逢映日翠鬟微蕩漾  
泣春紅淚半惺鬆石家宅裏珊瑚碎太白樽中琥珀濃  
誰比楊妃酣醉後殘妝零亂若爲容

上巳日誕辰諸同人挾女郎偕至漫賦

茅堂此日會羣仙神女來遊樂更偏雨潤草香煙脉脉  
風迴樹影蝶翩翩雅歌豈讓錢龍宴淺酌輕浮藥玉船  
烏兔分明如過隙壺觴且與漫周旋

青田共醉暮春天我愛洪崖笑拍肩野草斜侵經宿雨  
閒花輕鎖半枝煙蘭香豈必憐張碩楊廣何由得絳仙  
不爲賦詩忙刻燭宵深應任海棠顛

海棠

困酣無力舞東風似睡初醒似夢中芳思弄煙春曉晚  
柔情照月夜玲瓏半拋紅淚諸緣寂一隅珠簾萬象空  
惆悵馬嵬魂斷後至今姚冶有誰同

宿醒

宿醒未解竟如何雀舌新烹味較多紫燕但憑拋玉剪  
黃鶯一任擲金梭願聞香國蘭千穗或聽清音竹數科  
意可滿鑪經百卷藤牀枯坐學維摩

偶題同二兄作

獨行江畔弔湘靈誰識前生是歲星天上朝元攜萼綠  
竹間煮茗付樵青風飄羊角縈金柳浪捲魚鱗碎錦萍  
夜半鳳簫吹弄玉幾回傾耳月中聽

山行座有雲仙校書

無邊春思濶於天幾度相看益惘然鬪草不逢鶯燕侶  
夢山喜遇雨雲仙歌聲婉轉低銀燭酒態沉酣落翠鈿  
豈是對君愁分淺白頭應笑伴花眠

謝依成齋中賞牡丹

躡屐尋芳風雨頻謝庭名種轉須親長吟豈必辭三雅  
痛飲真堪醉十旬傍檻憐香誰似我移燈照影更何人

殿春獨擅花王號若箇穠華繼後塵

苦雨

冷風送雨到閒門臺上花枝總斷魂豈有燕鶯喧白日  
但愁薄激易黃昏竹生別院搖青影苔鎖空庭長綠痕  
多少欲歸歸未得天涯何處泣王孫

東同人

小庭花放一枝紅已遇霏霏又遇風蔣詡就荒三徑內  
張衡久困四愁中亦知獨坐非長策且望朋來罄短衷  
若箇麴生拚盡醉不辭觴政作元戎

傲履

製就雙鳧憐病婦裁成丹豹貺潛夫半生在踏崎嶇路

今日真逢坦易途敢比元公誇赤舄弗貪上客綴明珠  
登山訪舊渾閒事且向花前學步趨

女紅

猶覺春寒雪滿庭經營小閣貯娉婷幾多燕壘無心看  
饒有鶯啼那肯聽閉戶但憑梅結子隔簾誰見鳥梳翎  
績麻刺繡尋常事借得餘光不暫停

問字

韶年二八正盈盈解識春風笑面迎待月開簾延老桂  
采蘭約伴趁新晴金波泛處杯常滿玉笛攜來手自橫  
幾度攤書吟麗句暗將難字問先生

禮佛



夜深獨對一燈青  
檢點開函誦佛經  
香結瑞煙浮五色  
光凝寶髻集千靈  
遙看合掌蓮花座  
遠隔臨窗雲母屏  
幾度覓茶將口漱  
口脂猶恐帶餘腥

酣睡

銀燭燒殘鼓二鼙  
開簾偷看睡情濃  
鳳衾半覆香肌冷  
鴛枕橫陳綠鬢鬆  
兩朶碧蓮浮繡褥  
一方紅錦貼酥胸  
低頭細認春風面  
含雨天桃花正穠

曉窗

褰帷微度麝蘭香  
一朶分明睡海棠  
脂粉漫調先啓匣  
衣裳忙整試開箱  
翠鈿貼鬢飛蝴蝶  
寶髻圍花集鳳凰  
誰料有人窗外立  
倚欄凝睇看梳妝

妝成

秀色堪餐可療饑  
妝成應歎世間稀  
如雲不假珠為飾  
似玉何須錦作衣  
紅日一簾花欲放  
綠陰滿院蝶交飛  
飄飄仙珮超塵外  
疑是朝元控鶴歸

折花

夢蘭心性踏春晴  
嫩綠新紅撲面迎  
疑似空庭飛燕燕  
想他小字喚鶯鶯  
忽來鳥語無心聽  
折得花枝悄地行  
尾去漸看歸繡閣  
印苔蓮步有餘情

中酒

洞房中酒益風流  
醉後顛狂語不休  
對鏡笑誇花似貌  
開簾怒罵月如鈎  
輕攜婢手教搔背  
私囑郎言要上頭

直至夜深橫繡榻翠鈿零落挂香篝

夢中神女

琉璃亭館水晶簾貯得蘭香是謫仙  
月上海棠紅潑潑風吹楊柳綠娟娟  
歌聲繚繞浮天末花氣氤氳到枕邊  
睡醒五更消不得繡帷香冷意茫然

畫上美人

看殺溫柔若有神阿誰於我畫真真  
牙籤滿架堆千軸錦帳橫陳待箇人  
却笑青春輕似燕翻憐白髮爛如銀  
年來習靜常鍵戶愛汝無言伴老身

舟行雜感

柳絲斜繫木蘭舟獨上高原一散愁  
世界大千雲影幻野花多半夕陽收  
笙歌細逐遊人耳霜雪平堆老子頭  
洗眼再看看不見蒼茫煙霧接林丘  
繁紅零亂麥初秋趁水東流泛小舟  
黃犬漫驚行客過綠楊如喜故人投  
斷腸三月萋萋草刺眼千村箇箇牛  
我是釣鰲江上者不來滄海下魚鉤

經故居作

分明生長此樓中衰謝雙親我又翁  
一事未成羞浪度百身難贖恨無窮  
依稀竹馬精神好彷彿孩提笑語通  
回首昔年如隔世剩魂殘夢倚墻東

獨自扶七弟柩至佘山感而賦此

鵲鷓原上黯然傷那禁潛潛淚兩行  
執紼不聞來至戚

撫棺殊覺有餘涼  
松楸常護山川老  
丘隴還隨日月長  
轉眼但看人世變  
任他黑白與青黃

扁舟送爾到窮鄉  
四面高峰水一方  
人比花黃瘦多許  
淚如泉湧斛難量  
寒冬那得青蠅弔  
野渚惟看白鶴翔  
堪歎有靈終寂寂  
不歸華表話滄桑

春來散步話斜陽  
閱遍青山幾道場  
醉卧不知花蕩漾  
醒歸只見月蒼茫  
豈期雁字成中斷  
翻令鴟鴞得中傷  
保護掌珠唯爾舅  
我衰猶可一相將

鬚鬢看看白似霜  
更愁老眼漸茫茫  
升沉我亦唯天命  
聚散君真類戲場  
人自不思都這樣  
死誰肯放只平常  
世間公道猶三代  
請各回頭笑斷腸

將葬妻弟吳赤霞因示內姪

閨牆多難爲君悲  
大厦將傾勢莫支  
心血幾經嘔欲盡  
鬢毛敢惜白於絲  
園田依舊欣無恙  
丘隴而今會有期  
不道九原成間隔  
半生勞苦望誰知

寄盛悔亭

爲愛羅浮到海天  
一肩行李落誰邊  
寒香庾嶺應看遍  
絳雪楓亭有夢牽  
錦石生輝穿小洞  
花田無主憶當年  
墨江元近端溪玉  
擲地金聲待爾傳

白杜鵑花

山花染血變成紅  
何意清標又不同  
羞逐天桃開曉日  
愛隨玉樹伴春風  
梨花飄落渾無迹  
柳絮飛來亦似空

安得海南雙白燕呢喃枝上月明中

泛艇

秋深冷淡荻蘆洲泛艇尋芳紀勝遊  
雨過碧山清到底風飄黃葉落從頭  
半灣流水環茅屋數點殘紅映晚樓  
忙取村醪澆塊壘好看人世類蜉蝣

湖上

凍雲凝水碧於苔湖上東風獵獵來  
枯樹亂鴉啼不了寒山密霧鎖難開  
那能勝友聯詩句安得村翁獻酒杯  
忙整歸橈問三老殘燈零落釣魚臺

春陰

春陰樓閣鎖寒煙望裏垂楊繫釣船  
碧玉遶堤莎草嫩

黃金潑地菜花鮮燕穿簾幕泥還濕  
鶯轉林梢語漸圓安得故人來共醉  
一燈相對話逃禪

對花憶查季屏

對花那禁不傷神勞動形骸便苦辛  
兄弟半爲泉下客親朋無復意中人  
思超萬象多如草髮到衰年盡變銀  
安得相隨畢吏部甕邊時醉竹生春

寒食日吳淞江晚泊

吳淞江上逢寒食紀信祠前度雨天  
古渡桃花春漠漠新阡柳葉晚娟娟  
獨眠釣艇篷窗濕輕颺茶煙榆火煎  
三尺孩提笑相問回思禹績轉茫然

杏花殘

小窗紅淚點香塵似怨東風帶雨頻和靖已違無好夢  
劉郎何計得相親愁深燕剪鶯梭急妬殺蜂黃蝶粉新  
春色三分能有幾隔牆長伴獨眠人  
花片飄零粉褪新形容憔悴泣芳辰怕聽玉管吹三疊  
羞對金尊醉十旬涼雨夜寒惟弔影濕煙朝散正愁人  
他時抱子君休羨猶勝無端度一春

贈唐餘年

病中滋味我深諳潦倒殘骸愧不堪每向杏林邀董奉  
爲尋橘井拜蘇耽逍遙獨得琴書樂通隱惟知泉石貪  
尊酒流連消永日一簾花影接清談

空明子詩集卷之十

練川兄樸村先生選

華亭張榮景桓著

奉和趙柳介人日穀日二首

共知人日稱佳節今日題詩得故人柏酒尚餘澆塊壘  
辛盤聊與薦交親庭留宿鳥雙棲樹戶納薰風一片春  
安得九州同富庶父慈子孝樂天倫

連年旱澇苦村農穀日晴和喜氣重可卜歲豐盈萬物  
不辜 聖德樂三冬踏青此日傳巴蜀賜綵當時話景  
龍共慶太平欣有象康衢鼓腹一相從

翁馭臣以蘭花見贈賦謝

曾聞宣聖曲中彈幾度清芬散席端空谷傳來情自迥

當門鉏却性何殘亦知九畹移根遠况過三冬積雪寒  
贈我荒齋春滿室論心原是勝金蘭

阱虎歎

共驚猛氣託山阿爭向人間被網羅爪利那堪兼口毒  
性殘不復養天和一籠任鎖愁無限若箇垂憐喚奈何  
多少英風摧折盡看看生意欲消磨

步冬日牡丹原韻

冷雨淒風節序催驚看妖豔在層臺虛疑國色從天降  
浪說仙家頃刻開紅紫作緣成別趣雪霜爲伴絕纖埃  
無端產此寧祥瑞安得韓公劖去來

推窗驚見一枝開共訝天香帶雪來如此那堪名富貴  
然而差喜隔塵埃紅妝冷落嚴霜染玉貌凋傷朔氣催  
誰料詩人偏好事醉吟殘月傍瑤臺

白髮星星鏡裏催何緣冬日遇花開不聞學士吟詩到  
誰遣真妃踏雪來魂斷冷風臨曲檻夢迷寒月泣荒臺  
可憐無限尋芳客枉惹人間沒脚埃

先壟新建丙舍併植松柏修石梁事竣瞻拜有作  
吁嗟先澤那能忘手種青松列幾行新構數椽依菴竹  
舊環一水跨虹梁風生慘澹虬龍吼日落昏黃鳥雀藏  
但願子孫常世守不教岡壟牧牛羊

贈岑青岩

調朱弄粉日愁煎虛擲韶華四十年明鏡空悲春易老

空明子詩集卷之十  
世人爭詫貌如仙，芳心自許堪金屋。蓬鬢無由到錦筵，  
寄語漢廷延壽道，丹青好與畫嬋娟。

贈懷世修

衡門寂寂枕濂溪，嘉樹菁蔥望裏迷。偶向小窗拈舊韻，  
別開大手著新題。花生彩筆調鶯舌，字落宮箋噴麝臍。  
衰病頻仍兼閉戶，已聞王豹化河西。  
簾移花影暗香浮，寂寞西窗夜景幽。一句冷吟淒斷骨，  
半鉤殘月澹於秋。亦知身世無多著，且與彭殤共此丘。  
門外春風正駘宕，落紅飛絮不勝愁。

顧旁皋以亡兒復來作詩見慰因步原韻奉答

盲風怪雨逼階墀，摧我芝蘭第一枝。病比春前還轉劇，  
痛除死後或能支。石麟化去終無迹，丁鶴歸來未有期。  
腸斷夜窗吟咏處，挑燈不忍讀君詩。

悼亡兒壘

十年心血半消磨，爲汝支撐不奈何。豈料鶴飛天上去，  
翻驚駒影隙中過。筆牀花落無生色，書卷塵封絕嘯歌。  
我是病軀尤潦倒，那堪一夢寄南柯。

淒淒黃葉冷風侵，雷閃餘光那可尋。半枕牽情多入夢，  
百年遺恨總關心。花前獨自愁千結，月下何人酒共斟。  
回想過庭親愛處，不禁紅淚濕衣襟。

中年得子本鍾情，慧質偏能析理精。可惜讀書真種子，  
偏教騎鶴上瑤京。因思痛裏還愁痛，何似生前不有生。

如此下場真好笑幾回清夢哭殘更  
爲愛秋來數點山綠雲踏遍屐痕斑誰知幾日成長夜  
一別千年作大還淚落真疑鵲嘔血機忘那及鷺偷閒  
若將此際愁懷較更倍羊腸曲九灣

內子吳孺人五十誕辰

荆妻五十方初度兒子傷心一月餘拜起未能嗟若此  
親知相賀欲何如已拚明喪還投杖幸有朋來免索居  
老景不堪聊自慰懷中轉眼讀詩書

招魂

可憐懷抱識之無十六年來德不孤重鎖山房間竹木  
半殘書卷雜精粗愁如春草燒難盡淚似冬泉瀉卽枯  
那得返魂香一炷透開覺路出迷途

顧旁皋贈詩期亡兒之復來因祖其意以爲之

鬚髮蒼然一病翁那堪悲泣向西風平生不信陰陽理  
今日全憑造化功錯走隣家羊叔子重來本地顧非熊  
他年若記從前事應念衰親淚已紅

思兒淚盡轉盲聾我是塵寰孽裸蟲漠漠有天終不應  
茫茫無路詎能通三更怕聽簾前雨一盞驚聞屋角風  
倘使再生誠可卜敢辭馘禮梵王宮

達生寄慎微上人

思量無那學癡聾聚散悲歡總是空更有達生真妙訣  
譬如我死付淒風三千界裏沉砂子十五年前託夢中



若遇故交憐皓首爲言返老欲還童

夜坐

寒月淒涼叫雁鴻可憐長夜動哀衷酒爐不復隨身畔  
藥竈多應伴漏終但有老妻啼愛子生憎小婢鬪頑童  
祇緣命蹇愁如許豈敢高聲怨太空

共訝驚風一夕驕朝來無那折柔條三春辜負花前約  
五夜空悲月下招豈少繁紅留眼角更多嫩綠沒裙腰  
可憐不是芝蘭種狼藉閒階恨未消

到老猶然事不更尚持直道拂人情身如孤月通宵皎  
心似寒潭澈底清得酒怕嘗愁宿疾無書可讀誤餘生  
就中還有三分望天意除非待晚成

教子何須苦認真可憐辜負十回春傷心每憶交三鼓  
淚眼偏驚近五旬睡鴨一鑪薰紙帳卷荷幾盞醉銀鱗  
閒凭小閣軒窗望看盡人間有福人

答隱能上人作步原韻

早知蘭玉被風侵恨未相從支道林看破死生隨本願  
任他去住不關心隙駒過影憐浮世石火餘光戀寸陰  
若使麒麟重下降賴君摩頂錫飛臨

答陳含美作步原韻

心孤桐樹干尋直露冷霜濃早見摧解痛庶幾詩作伴  
忘憂須待酒爲媒得朋花逕隨時掃憶子書窗不忍開  
倘果藍田重種玉春盤敢惜罄餘杯

和芳池自策兩禪師仲冬遊橫雲山聯句原韻  
方外看山何必歸呼朋連袂兩相依高吟已足開青嶂  
破衲尤能戀翠微躡屐穿雲尋竹逕攜筇踏月叩柴扉  
世間功業成虛話入洛無端送陸機

和岑青岩原韻

漫調瑤臺五色芝月明常照露華滋豈期一夕風前墮  
反動三更夢裏思魂斷曉霜空寂寞耳驚暮雨重凄其  
譬如食盡黃連味苦入心中只自知

浮生

浮生何意困書囚浪度無端五十秋因愛草香思席地  
為憐花影怯登樓愁多要解全憑酒火弱誰添欲盡油  
幸得良朋頻見顧任從投募醉鄉侯

賦送岑青岩遊包山

澹煙寒霧接姑蘇一棹衝波泛五湖白傅扁舟曾採橘  
翠峰古剎正啼烏墨花好寫江天雪筆陣兼收滄海珠  
管取兩山題賞遍興來莫負酒家胡

讀顧旁皋嶺南梅花集句三十首

不獨梅花別有香孤踪老幹兩蒼蒼詩篇並取清濃淡  
人物兼收元宋唐回首舊遊如夢寐沉吟古調叶宮商  
相逢漫說當年事青鳥啾啾正夕陽

聽梵呈桐雲上人

列成嚴陣鎖愁城哀苦終宵到五更夢裏忽聞天籟發

醒來已覺道心生紛紛萬象俱歸土寂寂諸緣不計名  
檢點耳根學清淨解除煩惱得忘情

元旦

百事經心到五更追思世態倍關情壯求獨是從吾好  
老畏人輕莫晚成五十知非仍澹漠乾坤得所際承平  
千秋事業如碁局一著輸贏任此枰

立春日

柳腰梅額鬪傾城我獨何為倍慘情一切屏除惟剩酒  
萬緣斷絕但貪晴眼前止覺乾坤隘門外常聞蠻觸爭  
覓得深山栽異卉任他開老不知名

承諸同人見訪留飲紅毛酒有作

勝友尋春到曲房春風駘宕好春光不求醉裏顛狂趣  
枉度人間日月長此際訂交須醕酌他年得意莫炎涼  
軒西夕照橫梅影傾盡千杯正慨慷

飲紅毛酒後一日作

新鶯初轉晝初長夢入華胥近醉鄉虛館正宜春獨睡  
亞枝時見鳥偷藏詩魔常欠三分債海物還餘十日香  
安得典裘重貰酒故人相聚一顏唐

自怡

塵緣隔斷坐春陰獨對空山興轉深稍有是非憑我舌  
並無榮辱亂人心庭梅借雨三分白岸柳偷風一線金  
松韻幾聲鶯百轉恍疑天半奏仙音

夜起獨坐

擁被挑燈手一編閒燒睡鴨半爐煙嬌兒索笑頻掀帳  
小婢瞞人但簸錢玉管曲長花冷夜金尊酒滿月明天  
如何獨自厭厭坐只爲新愁夢裏牽

江上同陳映璿三甥散步作

江上行春綠漸肥四邊松竹欲成圍晴搖柳線金迎面  
風打梅花玉點衣山靜不聞人語亂日長祇覺鳥聲稀  
閒尋蘭若高僧話相對空潭看落暉

閒吟

輕風習習透疎簾盼望新晴幾度占半卷哀吟惟我獨  
萬重心事有誰兼白鬚與髮真成億青草和天遠欲粘  
一路酸辛愁到此耐他蔗境晚來甜

咏紅毛酒

小窗雲淡日初低斗酒相將伴隻鷄傾出色同紅瑪瑙  
盛來杯泛綠玻璃芬芳已奪中華味封識猶傳異國題  
欲訪醉鄉真廣大須拚一飲竟成泥

舟行

凍雲天末動微瀾一舸衝波夢未闌柔櫓漫搖新漲濶  
輕煙遙鎖小桃殘鶯花不解留春色風雨無端作夜寒  
惆悵故人俱白首幾回服食學劉安  
半江晴雪蹙輕紋澹寫羊欣白練裙川斷似連遮嫩柳  
天空如洗抹微雲得來花雨疑成陣過去松聲寂不聞

我本煙霞塵外客正堪泛宅一離羣  
四山不礙白雲流大阜高原盡古丘堪歎獨醒空骯髒  
更憐皆醉亦蜉蝣我生豈羨棲林鳥人世爭誇衣繡牛  
聞道蓬萊多勝景跨龍騎鶴任遨遊

愁坐

風吹蘭玉滿閒階積雨空庭花逕埋愧我顛狂元亮酒  
任人調侃太常齋窗縈蛛網經時掃壁暗塵封幾度揩  
對景正愁春過半不堪黃鳥又啾啾

歸家見海棠盛開

乍晴天氣濕煙浮留得猩紅滿樹頭媚似太真才出浴  
豔如西子乍凝眸簾鉤不挂鶯聲澁畫檻平臨燕語稠

覓得一尊聊寄興篔簹紋斜展半牀幽

為仁

風清月白浩無邊識得天機自泰然誠正未能先窒慾  
修齊兼致莫談禪孔顏樂處須當究舜跖源頭定要研  
誰料為仁元易事常存生意在心田

郊行

遠山一抹見微痕踏遍春郊正斷魂茅舍竹籬看半掩  
板橋流水欲平吞辛荳滿樹誰家院楊柳垂條何處村  
為愛新鶯歌百轉不愁日暮近黃昏

對酒

竹冠芒履混樵漁滿炷鑪煙坐草廬日暖鶯聲千樹合

月明花影一簾虛但期對酒常浮白莫爲離羣歎索居  
身不如人惟富貴心能作聖在詩書

醉眠

晝長無那怕愁煎盡日消磨酒盞邊覓友黃鶯來樹底  
撲花粉蝶到尊前曲瓊蕩破湘妃影斗帳飄殘瑞獸煙  
卧看海棠春更好醉眠一枕小游仙

閏上巳五十初度

一春愁緒雨連綿七日晴和倍覺妍修禊何妨聊再舉  
結錢安用不重傳 聖明正沛蠲租詔衰朽初逢衣帛  
年把盞莫辭今夕醉醉歌礮石頌堯天

此生何必更悲辛萬事由天不在人看破世情俱是幻  
須知我體亦非真且隨俗態憐兒女要使精誠動鬼神  
一炷清香茶一盞閉門枯坐謝交親

同吳內子小飲

六齡總角蚤聯姻轉眼行年過五旬兒女喪完餘白髮  
夫妻老去失青春當茲愁病何堪問值此光陰孰與倫  
勸汝開懷飲杯酒譬如饑凍困江濱

諭徐妾

歎汝初生四五子止存幼女十三齡哭兒終日鵑啼血  
卧病經年鶴隨翎折得好花常未戴述來惡况總難聽  
欲除煩惱真無策拚飲醇醪醉不醒

和叔奕山兩弟共成贍族之舉喜而賦此

貧富由來事不同，有無相濟足相通。既叨覆庇高曾德，敢忘陶鈞造化功。一粒常懷耕者苦，兼珍還念族人窮。阿連指日登金馬，時厯瘡痍在眼中。

札寄都門弟姪屬以贍族事有作

老朽虛生屆五旬，可憐雙阮正青春。聯鑣共食天家祿，一念無忘宗族貧。舉火未能俱有待，借籌何惜特開陳。亦知物力真難得，滿目荒涼到苦辛。

過西園訪和叔弟

曾向西園幾度遊，攜筇重訪值新秋。半灣流水環華屋，數點蒼山罨畫樓。老檜逕邊尋野鹿，疎篁影裏見閒鷗。蛟龍豈是池中物，應笑愚兄守一丘。

客有以文正見許者愧謝漫賦

每思一本本應親，非附先賢續後塵。痛癢相關情自切，死生兼恤誼纔申。池塘夢草逢連弟，京國施恩異遠人。總爲祖宗綿世澤，不教虛度太平春。

登細林山

攜筇貪賞細林幽，夾路梧桐一片秋。山閣平臨紅葉亂，洞門深鎖綠筠稠。經聲盡日傳天籟，鳥語何年散客愁。獨立高峰恣遠眺，荻花如雪盪輕鷗。

卽事

秋江如練泛晴光，天末微雲白似霜。一棹波翻驚宿鷺，片帆風急過閒塘。交柯蔭水粘深綠，落日窺窗照淡黃。

卧讀西崑酬唱句鏗鏘滿紙足琳琅

客有以持籌握算文章伯說鬼談天道義人見贈者因成一噓書此奉酬

家貧歲月度艱辛珠桂經營二十春握管每慚輸後輩  
論心常欲託先民簾垂晝永吟花片燭剪更深話酒尊  
自愧白頭真潦倒未知佳什贈何人

青溪道中

路入青溪秋乍分嫩涼天氣日初曛心悲澤國漂紅蓼  
目斷煙江際白雲沒脚細埃應僅見打頭微浪詎堪聞  
持竿把釣渾閒事驚起漁灘鷺一羣

曉行

吳淞江口夢初闌背月晨征玉露寒幾點落紅楓葉濕  
數枝爭噪鵲聲乾心中但覺風光好眼底空驚天地寬  
惟有西成最堪歎汪洋一望獨悲酸

過玉峰

泛宅浮家此地過茫茫巨浸沒嘉禾千村盡落空濛際  
萬井惟聞歎息多絲柳樹欹愁暮雨白蘋風急怨江波  
何時載酒開懷抱重聽康衢鼓腹歌

吳門卽事

打窗風急暮雲多洪水滔天奈若何龜久堵牀始脫網  
魚纔泣釜忽凌波楊椿半浸枝牽荇茅屋全淹壁長莎  
忍見農人愁欲絕挂帆東去卧漁蓑



中秋前二夜同諸子登虎丘作

碧天無際白煙開  
力上高原一散懷  
倚檻花枝燈下見  
蔽江簫鼓月中來  
閱人多矣松千樹  
與子宜之酒百杯  
滿目蒿萊堪痛惜  
吳兒何事漫相猜

舟中題白鷗

面面芙蓉映巨川  
亂山堆裏一鷗眠  
水田獨宿隨高下  
野鳥無爭任後先  
風雨不驚容作夢  
地天忘大那知年  
思量素質真違俗  
敢望人間兒女憐

贈陳含美

獨樹高栖幾點鴉  
數竿修竹野人家  
半牀書卷三更火  
百斛松醪一盞茶  
豈有寸心干日月  
尚餘殘夢入煙霞

衡門不許尋常叩  
雲護瑤窗映碧紗

隱公以菱見餉賦謝

淼淼煙波隔梵宮  
此身無便駕東風  
應知一葦終須至  
莫道三山未易通  
沙角遠貽知念我  
愁腸欲寄孰如公  
深秋准擬瞻睂宇  
話到忘機悟到空

中秋夜登城樓望月與友人話別

羞向清時早白頭  
况逢佳節是中秋  
聲沈一曲霜娥怨  
月滿三更庾亮樓  
不羨幔亭成夢幻  
似登天柱任遨遊  
周生莫更梯雲取  
留與離人話別愁

九日同陳含美查季屏飲菱村齋

蓼紅蘋白晚雲涼  
散步菱村話夕陽  
醉我紫萸新酒熟

傲霜黃菊小園荒  
漁樵蓬徑高人里  
鷄黍家風隱者鄉  
知爾焚香常閉戶  
捲簾開卷得餘芳

喜接茹英弟南映姪贍族報章

後先接到平安帖  
珍重開函喜可知  
念我已煩勞夢想  
賑貧尤足見恩施  
一家濟美推雙阮  
千里同心在此時  
佇看三年應報最  
聯翩簪筆侍彤墀

丁亥戊子兩年連喪二子書此自慰兼以自嘲

當時教子倍堪憐  
編斷函穿不記年  
豈有功名希異日  
併無賢聖在從前  
立身直欲高千古  
體道還期貫百川  
誰料堂虛人去後  
一鈎殘月照窗邊

燒殘劫火便泠然  
再造清涼治寸田  
識得孽冤完宿債  
幾度問心堪自信  
不將餘恨怨蒼天

歷嘗艱苦備周旋  
看徹人情爾許年  
老去尚愁頭再黑  
慧來尤恐舌生蓮  
只宜閉戶聊肥遯  
不怕穿腸但醉眠  
莫笑商瞿過五十  
會看蘭玉滿庭前

讀書切勿似從前  
得子而今聽自然  
打破乾坤除苦惱  
不拘造化學神仙  
花香趁蝶忙開宴  
風順乘潮好放船  
共羨石麟聲譽早  
一鞭應占阿翁先

葬貞孝王節婦事竣有作

節婦字蘭文學王暹之女  
歸於練川李輔世甫  
二月而舅姑亡又八月而夫去世  
食貧茹苦三

十餘年事詳樸村先生王貞婦傳中亡後數載  
有故人子王汝師者係節婦之姪特來雲間謀  
所以合葬之予素讀樸村傳知節婦行甚悉是  
夜夢節婦授予大珠二顆醒來益覺心動卽託  
汝師經紀其事時當夏月地隔百餘里往返奔  
走爲之置田畝辦磚石鳩雜料庀衆工七日之  
間大事告竣新塋與侯峒曾之墓隔溪對峙忠  
節並傳四方會葬者千餘人無不嘖嘖歎爲異  
事吁非節婦有靈安能神速昭著若是哉吳郡  
太守陳滄洲聞其名而嘉之顏其墓道曰貞孝  
以垂不朽嗚呼節婦殆不死矣

驚看隻手獨擎天貞孝無虧洵兩全志苦一生完大節  
心堅同穴葬新阡孤臣有淚堪偕滴嗣子無聞誰與傳  
羸得芳名流齒頰表章還賴使君賢

憶亡友百繡六

往時愛誦我新詩誦我新詩醉酒卮幾度狂吟花放日  
數回閒咏月明時可憐宿草埋詞客空有同人弔故知  
惆悵半生零落甚那堪伯道更無兒

和桃源山莊詩

欣聽我友話山莊夾路桃花滿樹芳曲徑閒房通別院  
小橋流水帶斜陽那知世外滄桑變但覺天高日月長  
幾度煙波空寄傲不曾洞口問漁郎

山莊正合住仙曹卧聽松風捲怒濤數點落紅清磬外  
一聲啼鳥碧天高衣冠約略傳三代鬚鬢依稀近二毛  
書卷飄然塵世隔任從門巷長蓬蒿

贈侯來英

家住花谿谿盡頭谿邊朝夕狎閒鷗仙桃結實三千歲  
椿樹敷榮八百秋鹿豕閒閒成漫趣乾坤窄窄只堪遊  
憑他世上滄桑改落拓胸襟不帶愁  
高風逸致木天然不愛逢迎不受憐出世煙霞常帶性  
入羣魚鳥且隨肩吟花得句溪邊坐醉月尋山洞口眠  
餘技猶能驚四座繪香能事有誰傳

偶檢舊笥得王玠右先生贈

先君五十壽言一

軸同魯亭介山昊霑伊章孟昭五姪展閱有作  
瑤章捧出絕氛埃手澤猶存今始開鐵畫銀鈎扛鼎力  
天空海濶謫仙才無端埋玉悲荒草不及臨喪哭死灰  
爾祖素心惟一老朗吟佳什勝瓊瑰

和友人一片秋

蕙帳塵封一片秋蕭蕭微雨淚凝眸珮環冷落詩箋歇  
粉黛飄零棋局收客館誰人關痛癢睡鄉何處覓溫柔  
傷心鸚鵡吟聯句朝夕喃喃念到頭

挽趙柳介

捧讀瓊瑤二十春結交於我更相親詩囊錦繡埋荒塚  
硯匣琉璃付暗塵酒後每思獨醒客燈前常憶抱愁人

鳳毛不及超宗有說到傷情倍楚辛

挽朱秉士

酸風刻骨慘雲煙狼藉圖書竹几邊敗屋數椽喧宿鳥  
荒園半畝聒流泉葬親未遂心常痛教子無依眼更穿  
腸斷一聲留不得匣琴韞玉孰爲傳

渡鴛湖登煙雨樓

帶白拖藍一葉舟颺煙捲霧曷勝秋百城雉堞當窗見  
二水鴛湖對面流旭日半浮楊柳岸彤雲不散荻蘆洲  
長吟忽動登高興繫纜松根獨倚樓

無題

姊妹聯行度曉春一回含笑一回嗔笑渠紫燕銜泥急  
嗔彼天桃結子頻問字窗前聲寂寂畫眉樓上語津津  
芳蘭共道宜男草欲採逡巡又倩人  
社燕穿簾入眼中柳條初放淡雲籠不關心事如春夢  
蹙損眉峰爲晚風一片閒愁輸皓月半腔幽怨託孤桐  
分明聽得鐘聲後著意焚香候醉翁  
海棠花下漫溫存燕語鶯啼欲斷魂柳線斜搖真有態  
苔錢細踏總無痕但愁掌上隨風去只恐樓前向月奔  
一曲清歌橫玉笛歌殘還與倒金尊  
滿階春思織苔紋待月空庭抵夜分石几下碁頻覆局  
玉壺賭酒動湔裙香浮小院蘭堆鬢影暗低窗梅罨雲  
除却笑歌簷馬外四圍人靜寂無聞

斜風細雨動兼旬  
夜夜燒燈禮上真  
紅燭漏深貪結藥  
玉釵光潤怕沾塵  
脂香好與茶香鬪  
歡意爭如妾意親  
九十芳辰虛度半  
繡衾餘冷不勝春

半窗梅影照西廂  
拂拭菱花待曉妝  
鬪草舊曾邀女伴  
梳頭今復倩孃行  
呼鬟錯認鶯初轉  
傅粉真疑玉有香  
最是一樁心事急  
翠蛾深淺屬檀郎

玉輪徐上碧天高  
一縷心香徹夜燒  
耐可堂前聞擊鼓  
那堪樓畔聽吹簫  
學吟未穩頻翻韻  
臨帖無殘且種蕉  
竊笑西軒諸姊妹  
翡翠帷不捲度良宵

徐徐同上最高樓  
萬事如心到白頭  
種就梅花新爛熳  
折來楊柳舊風流  
東吳競候麻姑降  
西華遙看玉女遊  
欲駕彩鸞周宇內  
計程應得一千秋

踏青結伴過山坳  
零落殘梅挂樹梢  
隨意攀條全帶媚  
拍肩開口半成嘲  
風寒已識花難放  
粉膩應知蝶未交  
倦倚闌干歸不得  
暫時遊冶莫相拋

鳳鞋微步隔花陰  
一寸春光一寸金  
紅袖摘蘭香有色  
翠裙拂草綠無心  
裁成剗襪埋頭繡  
偷得新詩擁鼻吟  
常笑當年卓氏女  
求凰聽曲便知音

萬妾有弄璋之兆作此志喜

桃杏爭開鬪錦霞  
諸姑伯姊慶宜家  
結褵乍試春風面  
解佩旋烹僊掌茶  
歸我四年常繡佛  
羨他五桂早萌芽  
問渠底事真消息  
請看階前豈蕊花

贈內兼述懷

綠窗窈窕洞房春對月吟詩不厭頻豈必沈腰頻減帶  
共愁潘鬢竟成銀孟先有德師先哲小玉憐才續後塵  
慚愧江花搖落盡願生遙集莫嫌貧

淚

落月空梁倍楚辛洞房嗚咽欲沾巾拋殘銀甲旋成顆  
滴向青衫暗有痕腸斷低徊河滿子心傷留戀戚夫人  
可憐多少如花貌哭損脂香過一春

笑

一笑嫣然那可攀徒勞凝想夢魂間微中不分含秋水  
巧處生憎隨翠鬟曾向裂繒窺啓齒更於射雉見開顏

平原請斬真無謂樓上歡聲直等閒

趙雪舫大甥念我年老無聊屢承見顧笑譚彌日

相契最深漫賦

每勞問訊便淒然愧我飄零幾十年無術竟爲人世棄  
多情猶得渭陽憐綠天仰望松千樹晴練遙看鏡滿川  
何計不違棲隱願及時同辦買山錢

無題

嬌鶯巧轉栖高樹新燕低飛度小窗是處觸來香有韻  
乍時行動蝶成雙怕輸鬪草藏金釧爭勝猜枚倒玉缸  
日落冶遊何地好夜深花月在春江

女史阿文經年濶別相對愴然感而賦此

蒙君相訪意相親動別經年語更真為感汝情幾病渴  
却憐我老欲傷神開喉婉轉歌三疊把盞低徊勸一巡  
又恐為雲巫峽去曲房窈窕不勝春

靜女吟為陸星聚賦

弗嫌裙布與釵荆不習蠶桑不習耕晚去樓頭看月上  
春來花底聽鶯鳴誰家能沼長洲苑若箇堪迷下蔡城  
自問生涯聊自給任他歌舞善逢迎

贈李次鄴

安貧樂道任逍遙空有文章度 聖朝探蹟自能同陸  
海起衰尤足並韓潮濤箋閒展揮佳什徐榻常懸謝寵  
招不羨侏儒終日飽已拚形迹混漁樵

奉和樸村大兄暮春渡泖見懷之作

半朶潛生泖上雲風迴蹙浪織成紋遙看圻柳眠三起  
細數沙鷗立一羣愛此丹霞思馬帳對渠白練憶羊裙  
不知甫里先生後占得清閒有幾分

香櫟

色似松花臭似蘭金丸擎出水晶盤侍中肇宋初更服  
丞相歸元乍請冠不分奉陪柑馥馥最宜高照月團團  
清芳獨抱憑人賞歷盡冰霜劇耐寒

混沌未分成太極黃金鍊就大還丹和枝漫剪餘深綠  
著露相將帶淺寒絕俗只應同傲菊生香真足並幽蘭  
笑他日月如輪轉兔走烏飛空擲丸



西風初剪綠衣裳，碩果欣看色正黃。形較木奴三倍大，質同盧橘十分香。餘芳日日侵斑管，清玩年年上玉堂。不比金螯堪佐餽，僅供人世筋頭嘗。

高樹菁蔥小院東，如梨似橘蕩秋風。拋來不與銀球異，擲處偏教金彈同。贏得幽香親茗椀，愛渠清供伴詩筒。一丸大藥無人試，可有仙翁住此中。

生子偶筆兼道鄙懷

衰翁朝夕求生子，只爲芸窗貯萬編。纔得已欣書種續，片時轉望道心傳。漸看總角提攜日，竚見成童誦讀年。壯歲倘邀明主眷，弗貪溫飽做前賢。

桂蘭並發小春天，正值長庚入夢年。共道瑞徵臨草徑，誰謂蒼蒼不足問。得魚豈敢更忘筌。

得子日承吳滄雪，姚菱村朱會萬諸。同人賦詩稱

慶作此致謝

夢熊本是尋常事，桐長孫枝獨見憐。投我玉芽誇麗句，愧君珠顆贈華篇。惟因善病神衰日，共慶宜男髮白年。浴罷蘭湯試啼後，秀眉豐角可能然。

懷惠白上人

方外同盟支道林，安禪遙憶虎谿深。影搖窗畔餘金粟，花滿階前散玉簪。入戶片雲參半偈，穿簾明月動長吟。爐煙歇後鐘聲靜，不使塵緣一點侵。

空明子詩集卷之十  
三  
兆熊彌月南映姪攜席設樂至舍稱賀賦謝

暮秋曾共阿咸譚頭白生兒已不堪私許傳經欣有續  
漫勞攜席賀宜男肴兼衆美開瓊宴酒散餘香逼翠嵐  
幾曲笙歌娛耳目深慙飽德醉沉酣

小齋喜共書竹與能渭占淑洙四姪及雲耕姪孫  
閒敘有作

老年兄弟半蕭條喜接芝蘭話寂寥壯歲及時須鼓勵  
髻齡計日定扶搖莫貪美酒聽鸚好且學新妝隨馬嬌  
癡湛遠期應不爽龍文准擬上衝霄

贈道士

魚自忘機鳥自閒麀踪鹿跡破苔斑豔開夾岸桃千樹

暖浸沿溪水一灣深鎖白雲迷玉洞忙飛紅日戀青山  
他時得侍清虛府知在仙曹第幾班  
訪於子來姻家不值

秋空天半散晴煙爲訪名賢到練川幾度欲尋揚子宅  
不知已泛孝廉船風和鸛鵲臨池浴日暖牛羊傍戶眠  
惆悵問奇今不遇幸逢蘭玉植庭前

和俞楠亭癸巳閏五攜家葺城官舍見芭蕉韻

蕉窗曾讀十年書又向官衙課閏餘映壁數株應識我  
出牆一卷最愁余攜家琴鶴聊同載閣戶風雲僅索居  
朝晚定逢楊得意鴻文爭羨馬相如

和俞楠亭之任雲間時值午節因官舍湫隘家眷

不能久留原韻

新見菖蒲發紫茸爛開澤國豔芙蓉五絲續命堪長繫  
一艇攜家少定踪敗壁更愁風片打破窗還賴紙條封  
榴花照眼徒虛語話別江干柳正濃

佛手柑

玲瓏隻手裹黃金不解敲鐘不撫琴指破迷途歸淨域  
撥開覺路引禪心芬芳堪配青蓮座清潔宜栽紫竹林  
閩海攜來供勝賞小窗肯放一塵侵

抱兒時忽見腮下新長黑鬚志喜

蕭齋高卧動經旬抱子迴看老病身鬚髮新添都是黑  
簡編重整不勝塵問詩問禮言無隱希聖希賢望更真  
天假餘年得強健步趨直欲逼前民

諭妾萬氏

憐君十八歸於我六載方能育寧馨抱子便思先世澤  
讀書堪繼一燈青兒童嗜好常須抑長大驕奢不可聽  
養德最關母氏訓三遷垂教足儀型

戲贈人參二首

生前不是真讎敵今日緣何困我身鬼蓋漫來徒作祟  
人銜數見漸愁貧敝裘為爾應常典破甑因君亦有塵  
幾度欲驅驅未得任從苓朮結成隣

半生憔悴有誰親藥籠相將伴老人五葉傳來苗自異  
三椹覓得體方真土精堪益千年壽神草能回萬物春

深感廿年調劑力昂藏留得病餘身

酬鍾豫凡致賀兆熊期歲之作

投我瓊瑤勝碎金未能報李愧滋深提戈漫說當年事  
希聖爭知異日心豈有夜光堪照乘敢誇雛鳳發清音  
相期虛館親三益得託芳塵喜不禁

老友蔣漢襄年近八旬與小兒兆熊同係十月十  
三生日故其自壽詩中結語念及小兒有提戈  
取印在今朝之句將詩索和走筆應之

羣誇取印阿熊嬌蔣誦生申同此朝自壽一篇承念及  
寄詩三徑遠相要早梅向暖爭先發晚菊經霜屬後凋  
如日初升潮正長不勞金母餉蟠桃

兆熊生時日出未幾松  
郡潮信十三方長故云

奕山弟自都門以朝冠朝靴賜兆熊賦謝

已勞垂問慶熊羆法服殷勤又見遺頂戴華冠欣共賞  
步趨芳躅遠相期祈天許我重生子循理知君定有兒  
回首畫船分袂日武丘山外月明時

樂道

逍遙函丈不言窮活潑天機在掌中樹底流鶯方睨睨  
堦前芳草自菁蔥詩書味永閒清畫山水緣深任好風  
歌詠先王琴一曲太和景象滿房櫳

新排十卷詩成寄陳含美李次鄴懷鏡渟

千編久矣耽經史三盞陶然樂聖賢望月呼童招鶴鹿  
對花覓景倩雲煙新知乍喜芝蘭臭舊雨相要松柏堅

十卷漫排君莫笑古來能有幾人傳

去歲甲午予年五十有六始得一男今乙未冬忽

聞瓜期漸近自笑頭白齒豁豈堪復作問世之

想但期抱子花間以咏歌太平足矣漫賦

返心日日凜冰兢敢炫奇才與異能修德最爲真上乘  
立言猶屬第三層欣看稚子纔歌笑未許頑身戀斗升  
閒步詠懷殊足樂漫攜花下一枝藤

劍津本係從子今繼歸高陽幼妹爲嗣於我又有一甥舅之分矣作此勉之

謝元本是安從子今作蕭家江總來伯舅並尊原不悖  
姪甥一體莫相猜纔看宗慤乘風去忽變羊曇乞墅迴

畫荻休忘阿母教何年捧檄報栽培

答和李次鄴贈言原韻四首

門掩蓬蒿醉六經絳帷風動見芳型盡收珠玉填瑤管  
獨有乾坤臥草亭彩鳳未儀丹穴嶺素鷗且狎綠楊汀  
憑他桃李閒開謝不作隨波大海萍

對君欲寫不平鳴未解茫茫造化情醉後漫書連錦字  
夢中猶賦步虛聲堅攻兩晉先登席直奪三唐舊斫營  
捧讀琳琅驚四座夜光贏得玉盤傾

聯盟已覺塵埃絕靜坐方知天地寬雉錦鳳苞欣並集  
驪珠魚目愧先刊近師小戶三蕉葉遠挹高風七里灘  
何日一竿同把釣唱酬煙月兩交歡

誰辨誰雌誰復雄算來勞逸總難同但看寶馬茵鋪錦  
爭及茅簷戶作蓬箬笠儘堪鳩杖挂緼袍猶得鴨爐烘  
相期不負春山約披拂花前君子風

答和鍾豫凡贈言原韻二首

江花落盡愧龍賓惠我瑤箋散玉塵干斗自同紫電貴  
嘔心贏得錦囊新早看論古才無敵定許揮毫筆有神  
一片宮商誰得似幾回杖策獨逡巡  
原知鸞鳳必衝霄暫坐芸窗一咏陶髮黑未凋潘岳鬢  
帶寬應減沈郎腰期君早續三台席愧我空譚七葉貂  
莫向淮南尋舊隱好攜赤管俟旁招

朱耕方枉顧不值

蒙君見訪我歸遲不獲春風共片時雌伏已輸鶯出谷  
雄飛敢比鳳來儀空慚應客童三尺更愧環門柳五枝  
子幼未能瞻北斗漫勞花逕費相思

自題四首

杜門從未怨飄零每喜蕭齋聚德星六載埋頭念一史  
五年沉醉十三經獨貪懸瀑層層雪更愛遙山點點青  
老矣歸歟堪自信此身應不作浮萍

羯鼓催花放早梅琢冰纔過豔陽回窗虛添炭排寒入  
巢好收簾待燕來半勺清泠同玉醴一拳巉石勝蓬萊  
謝家幼女嫺吟咏時引衰翁笑口開

爭誇萱蔻發菁蔥又感含胎造化功猶憶雙珠曾入夢

好看二俊早搏風香焚鵲尾煙凝碧燈泛鯨鱗光聚紅  
大婦引雛小婦笑推窗月照玉玲瓏  
幾度蓬山醉碧城醒來獨對楮先生是非安得高賢辨  
臧否空勞下士爭新柳幾枝鶯乍囀晴湖千頃鷺同盟  
眼前多少繁華景一笑春風撲面迎

空明先生詩集跋

空明爲造化之機霞空而月澄水明而蓮擢五色光華  
皆空明之氣鎔結所成故心不空則不靈不明則不能  
六通四達而任其變化先生內不失天真外不染世味  
宜其集之有取於斯當其發越如靈岳幽溪風泉月露  
杳然莫測其端倪而抒情喻事經緯人寰又如晴雲霽  
日開爽萬里登矚之章並秀靈運咏懷之撰比響步兵  
至若樂府古風近轍江庾遠踪揚馬真備一代之國工  
籥四音之元氣以爲艱而機躍神流若不經思以爲易  
而規嚴矩謹又非苟作不深而奧不淺而醇實而運之  
以空幽而揚之以明吾無間然矣同里晚生李如泌謹





